



DECEMBER 2024

VOLUME 64 | NO. 12

# Khristian Thukizakna

*Jesu Khrist*

- LAMDANG
- LEMTHEI
- PATHIAN HAT
- TANGTAWN PA
- LEMNA LAL



**EDITORIAL BOARD**

**Editor**

Rev. Dr. S. Vung Minthang

**Managing Editor**

Rev. Thawndouliau

**Contributing Editors**

Rev. K. Kamchinkhup

Rev. Nenglian Vualnam

**Production Managers**

Rev. V. Thangkhanmuan

Upa T. Paukhansiam

Mr. Mangthianlal Samte

**Circulation Manager**

Upa K. Jamchinthang

C/No. +91 8837208598

**Design & Setting**

Upa Khuplajem Guite

**LAKMAN:**

Kum khat ₹ 150.00

Dak ah ₹ 200.00

Bu khat ₹ 15.00

**CONTENTS**

1. EDITORIAL	: 1
2. LEMNA KHA TAWH KIPUMKHA TNA	: 3
3. BETHLEHEM A HONG PIANG KHRIST NA THEICHIANTA HIAM	: 8
4. CHIBAI BUKNA LAMDANG	: 11
5. BIBLE STUDY	: 13
6. GAMMIAL AW	: 19
7. DORCAS CORNER	: 25
8. YOUTH CORNER	: 28
9. EBC INNSUNG THU	: 30
10. DOTNA LEH DAWNNA	: 32
11. THU TUAMTUAM	: 33
12. ORDAIN SUNNA	: 34
13. KIPATHU GENNA LEH THUMNA DINGTE	: 38

**Thusuah ding piakna:**

Editor,  
Khristian Thukizakna  
Dorcass Hall, P. O. Box - 6,  
New Lamka,  
Manipur - 795006, India.

*Thusuah sung-a kigente  
Evangelical Baptist Convention  
Saptuam ngaihdan a hikim kholkei.  
Thusuahte'n amau thusuah ah moh a  
pawtek ding uh.*

## LEMNA KHA TOH KIPUMKHATNA

*Amah i kilemna ahi; aman ei nihte khat a siam in i kikal a  
kimelmakna banglai a hihchimta hi (Eph 2:14).*

“**H**un tuibang kiam in mual khum zel, lei thil tangtawn Hdaih omlou, tangtawn thilte kia lam-en in Pathian khut muanhuai len in” chi a la i sak bang in hun paizel ah tukum a ding a Khristian Thukizakna suah tawpna leh kum 2024 kha nanungpen tan pitung in i omta hi. Khristmas leh Kumthak hunpite lungsim a om in khanawn vai ding gel neuhneuh hun ahi nawnta hi. Khristmas inkuan kimtaka zatkhawm ding, lawm-le-vual toh nuamtaka zat ding, nekkhawmna bawl ding, nik-le-puan hoih silh ding, lawm-le-vual toh nuam theipen a kithuah ding, khuangpi leh sialki toh lam a Toupa phat ding chih khawng mi tuamtuam duhthusam ahi ngei ding hi.

Huchih lai in gal nei i hi chih lungsim ah hong suakkhe zel hi. A selam in gen leng ei a tengkhawmte kipumkhata thilngat khat neia pankhawm ahun laitaka kikhennen sawmsawm laite’n tua ka gam i chihchihte uh lua Zhou den ding mah i hidiam chih bang lunghimoh huai a suahton om hi. Mulkimhuai theitawp, zahlakhuai thei tawp, leh melse thei tawp a soisak leh thah in i om uhi. I damna ding omsun separate administration ahi chiin i ngen ua phualpi solkal in UT hitheilou ding hon chipah zomah uhi. State Govt. apan panpihna bangmah hong pai nawnlou in eimah vengsung lampi bang i kibawl ua, i damdawi-innte, i gam puahna dingte leng chik chianga state govt. apan hongpai nawn ding a hihiam chih theihbat hinawnlou phot hi.

Tulaiin a natna hiai ahi chih theihkhiak louh a siphutphut chihbang hong om hi. Natna omlou lah kisi mawklou dia eite’n i theihlouh man ahi peuhmah hi. Natna haksa deuhthe sai ding siamna leh vanzat omlou ahihman in, anei liaite’n khopi lam zuan, a neiloute’n i lupna tung a damsung ni simdan i siam mai ngai ding abang hi. Galtai tampite nek-le-tak haksatna ban ah tate laisimna ding ngaihtuah haksa sa tam mahmah hi. Saptuam leh khotang pawl tuamtuamte’n leng hiai mihinpihte haksatnate (humanitarian crisis) nidang sanga

i ngaihsak zawk sem uh kisam hi. Summuh baihlamna om sun tuh zuhuan, khamtheih zuak, poppy lei bawl chihte ah mitampi saltang omta uhi. Azuak aom leh alei om, poppy lei bawl a om leh ane om, zu huan a om leh a dawn om chihna ahihman in mi khat nekzonna society siatna hizel hi. I buaina uh thil khatkia ahikei a political, social, economic, psychological, moral, leh spiritual ahihman in a damna ding poimoh masapen ahi.

I dinmun uh hichi ahihman in bangmah ngaihtuahlou a 'ken ka nek nak leh' chih ngaihdan kia toh om hithiat thil hithei hinawnlou hi. Thil paidan (system) diklou i chih chiang in a mihing diklou ahi maimah hi. I gam damlou, i nam uh damlou, i chih chiang in leng a mimalte damlou chihna ahi leltak hi. Mi tampite'n "i damna ding zaw kivaihawmna tuam ahi" achi ua adeihhuai mahmah hi. Ahia tua i siatnate, kani lei bawl hang a, zu huan, khamtheih a sumdawng, corruption a kibual, kimudah, kigensia hanga hiai tengpi toh kivaihawmna tuam sung ah lut leng anoptuanna ding theihzoh huailou asuak hi. Pathian mitmuh a diktatna igen chiangin Biakin sung a diktatna hilou in office nasepna ah, mistri nasepna ah, dawr bawlna ah, contract nasepna leh niteng i gamtatna a diktatna gen ihi.

Ahiehleh bang lametna i neia, i suahtakna ding lampi a omlai diam chih dotna dawwna tuh "He! om tham e, Toupa kiang ah kik leng damna om lua ahi" chih ahi (Hos 14:4; Jer 33:6; Is 57:18). I damna ding omsun Jesu Khrist gintakna leh Ama' deihdan a hinna ahi. A mihing dam leng i politics dam ding, i khotang dam ding, i nasepna siangthou a etlawm ding ahi lel hi. Moral omlou politics in i gam bawl hoih tuanlou ding hi. Huai moral i chih tuh Jesu Khrist deihdan a hinna i genna ahi. Kam kia a itna leh kam kia a kipumkhatna in tua i dinmun tan hontun hi. I nam sung a Jesu Khrist kumpi a i koih keileh phaizang mite genlouh ei leh ei leng kihihse thei ding khop a kihotuahte i hi uhi. Jesu Khrist i kilemna uh ahi, Amah alai ah koih leng kilemna om ding a, kilemna in kipumkhatna ahon tun ding hi. Bangziaka i laka kihuatna bei theilou, bangziaka kingaihdamna om theilou hiam i chih leh kimelmakna banglai (wall) a om ziak ahi. Kimelmakna banglai hihchim theipa Jesu kiang i zuan ding uh. ■

# LEMNA KHA TAWH KIPUMKHATNA

Rev. N. Tuang Lang, *DS vangai Division*

*“Tungnungpen ah Pathian thupi henla, leitung a akipahpih mahmah mihingte lak ah lemthu leng hen” a chi uhi (Luka 2:14). Pathian Kha pi a om peumahte zaw, Pathian tate ahi ngal ua (Romete 8:14).*

**T**HUMAPI: Tu December kha thupi *“Lemna Kha Tawh Kipumkhatna”* chih thupi poimawhtak gelh thei dia hamphatna hon pia heutute tung leh, gelh thei ding a hinna-damna leh hun hoih leh manpha hon pia Pathian tung ah kipahthu ka gen masa hi.

**THUPATNA:** Kilemna omlou in kipumkhatna chih om theilou a, huchihmahbang in kipumkhatna omlou in kilemna leng om thei samlou hi. Huaiziak in hiai geel tuh kikhen theilou; a omkhawm leh a tonkhawm ahi uhi. Aziaktuh mi kipumkhatte kilemlou theilou ua, huchimahbang in mi kilemte kipumkhat leh kituaktak in omkhawm thei uhi. *Jesu Khrist nungzui masate'n hiai bang hinkhua na hinkhiakpih in, munkhat ah lungsim munkhat pua in leh neih-le-lam nangawn kikap in, kilemtak in kipumkhat thei uhi. (Nasepte 2:1; 2:44; 4:32)* Gingtu leh nungzui masate kia hilou in Lemna Kha (Pa Pathian, Tapa Pathian leh Kha Siangthou Pathian) tawh kipumkhat Bible a i muhtheih, Eden Huan a Pathian in amah batpih a abawl

leh akoih; Adam leh Evi tawh kilem leh kipumkhat a omna uah leng kimu thei hi. Himahleh hiai kilemna leh kipumkhatna melma setan nasep leh, athu manna ziak in hihsiat in hong om a, hiai kilemna leh kipumkhatna kitan zopna ding in Vanmang Tapa hilhial in a hinna hong luikhiak ngai hi. (Genesis 1:26-28; 2:7-8; 3:1-24; Romete 5:12-19)

**MIHING PIANPIH KILEMNA LEH KIPUMKHATNA:** Mihing mihinna a suak kilemna/ki-itna leh kipumkhatna in gamgi or phakchiam nei hi. Gil-a-gah a goutan, a tanu/tapa hi, himahleh a pianpih mihinna in dawhzou nawn mahmah lou leh a itna in baan zou nawn mahmah lou a, inn apan a tapa/tanu hawlkhia a kholak a vakvai maimah bang, ahikheileh tanchinbu/

newspaper khawng a *“Hiai ka tapa/tanu... banghiam chi a gamtat khelhna a neih leh moh ka paw kei ding uh. Ka thuzawh louh uh ahi”* chi a suah bang a kallak in muhtheih in om hi. Bible ah numei in a angpom nau nawine lai mangngilh thei ahihdan a gen ban ah, kial nasat luat ziaak a tate nasan it zou lou a anak thu uh kimu hi. (Isai 49:15; 2Kumpipate 6:26-29) Kiathamlou in leitung a kilemna leh kipumkhatna ding in thukhun leh kilemna bawl nam leh gam tampi om mahleh a bawlte mah a palsattu hizel uhi. I gen ut tak tuh hiai ahi; Mihing pianpilh kilemna itna leh kipumkhatna in buaina tawpkhawk hiam, ahikhe’h lungkhamna- lungdonna tawpkhawk leh lungkim louhna tawpkhawk tan a tunchiang in, kilem leh ki-it zou nawn mahmah lou a kipumkhat zoh nawn louhna tun thei mawk hi! Hiai bang thilte’n gamgi neilou *Pathian apan kilemna kha leh kipumkhatna* i poimawh dan kilangsak mahmah hi.

**LEMNA LEH KIPUMKHATNA PE THEI KUA A HIA?** Mihing kuamah in khantawn daih kilemna leh kipumkhatna pe theilou ahihdan atung ah i genta hi. Khantawn kia thamlou

a tangtawn daih kilemna leh kipumkhatna pethei khat kia om a, huaituh kuamah dang hilou in PATHIAN ahi. I Hondampa Thaunilh Jesu’n, *“Pathian zaw kha ahi a, a bemite’n kha leh thutak a abiak ngeingei ding uh ahi”* chi hi (Johan 4:24). Pathian i chih Chiang in Pa Pathian, Tapa Pathian leh Kha Siangthou Pathian i genna ahi. Pathian, leitung leh vantung a thil om tengteng siamtu leh a tung ua thuneitu, Amah kia *lemna kha a kipumkhatna pethei omsun* ahi hi (Romete 5:1).

**BANG KILEM LOUHNA LEH KIPUMKHAT THEIH LOUHNA OM?** Pathian apan kilemna kha leh kipumkhatna om theihlouhna dia phatuamngaitak leh khawllou hial a panlatu kuamah dang hilou in *Setan/Diabol* ahi (1Peter 5:8; Job 2:1-2). Atung a Pathian in mihing masapen Adam leh Evi a bawl in, kilemtak leh kipumkhat in, kizopna hoihtak nei in Eden Huan ah om uhi. I theihchiat bang un Setan/Diabol hong kilang in, aman gitlough piltak a khem in khelhna a pukna tun hi. Pathian thupiak manlouhna ziaak in Pathian leh mihing kal kizopna hoihtak om a kilemtak leh kipumkhat a omna pen

hihsiat a om in dinmun setawp ah mihingte ki-omta hi (Genesis 3:1-24; Romete 7:7-11)). Khelhna leh thulimlouhna in Pathian leh mihing kal hon khenta hi (Isai 59:1-2). Hiaiziak mah in mihing in a pianpih pilna-siamna leh felna-kizenna zang in theihtawp suah mahleh, tua in kilemna leh kipumkhatna tun theilou himhim hi.

**KILEMNA LEH KIPUMKHATNA OM THEIHNA DIA PATHIAN NASEP:** Mihingte ei-le-ei kihondam thei kuamah i omlouh lai un, Pathian mah in A itna diktak nasep a hon langsak in, thil thawnpiak thupitak hon pia hi. Tua thil thawnpiak tuh A Tapa tangkhat Jesu Khrist ahi (Johan 3:16). Mihing leh Pathian kal kizopna kitan zomkik ding in Pathian Tapa hilhial mihing bang a hong kibawl in leh mihing mel hon pu in, khelhna man pe ding leh Pathian lungkimsak ding a hong kipumpiak in, khelhna man piak ding hong zohsakta hi. Halelujah! (Johan 19:28-30; Philippite 2:5-11). Pa Pathian in A Tapa, mihing leh Amah kilemkikna ding leh kipumkhat nawnna ding a hon thawnpiak in, A Tapa in mihingte khelhna man, mulkimhuaitak leh zahlakhuaitak a Khrost a hong

thuak a hong piak en in, Amah leh Amah kilungkimsak hilhial hi! Pathian itna nak thupi tel mai maw!!!

**PATHIAN TAWH KILEM LEH KIPUMKHAT HINKHUA:**

Mi kuapeuh in Pathian thil thawnpiak A Tapa Jesu Khrist, a khelhna kiphawk leh kisik a, ginna tungtawn a, a mimal Lal leh Hondampa dia hon san chiang in Pathian tawh kilem leh kipumkhat in hong om theita hi (Ephesate 2:1-9). Tuabang a Pathian tawh kilemna hoihtak hon neih chiang in, midangte tawh *Pathian thu tawh kituak a kilemtheihna* hon nei theita hi. Aziaktuh amah a om Pathian Kha Siangthou panpihtu ding neita ahihman in. *Pathian thu tawh kituak a kilemtheihna* i chih chitchiatna bel Khristian or Piangthak hihziak a miteng leh thilteng tawh kilem thei himawk tuanlou i chih utna ahi hi (2Korinth 6:14; Philippite 1:27). I Toupa Jesu hong pian a, Van Angel honpite'n birthday la ngaih mahmah asak uh, *“Tungnungpen ah Pathian thupi henla, leitung a a kipahpih mahmah mihingte lak ah lemthu leng hen”* (Lk 2:14) chih ahi. Zawlnei Isai in naungek Jesu hong pian a a hihna ding a

genkholhte lak ah “*Lemna Lal*” chih leng tel hi (Isai 9:6). Jesu’n Tang tung a a thugenna ah, “*Lemna bawlte a hampha uh, Pathian tate chih ding ahi ngal ua.*” na chi hi (Matthai 5:9). Kumpi David in “...*lemna zong inla, a delh in delh in.*” na chi hi (Sam 34:14).

Mi Jesu Khrist tungtawn a Pathian tawh hong kilem Chiang in; Pathian Kha Siangthou piina leh makaihna tawh a hinkhua hong kikheng in, Kha Gahte a hinkhua ah gakhkiak theihna hamphatna leh hihtheihna hon neita hi. *Kha gah ahiehleh itna, kipahna, lemna, thuaktheihna, migitna, hoihna, muanhuaina, nunnemna, kidektheihna te ahizaw uhi; huchibang kalh lam in dan himhim a om kei hi.* (Galatiate 5:22-23). Hiai kha gahte avek in sut in sui man kei mahle hang, ITNA saulou in enkhawm le uthuai ka sa hi.

Tulai khovel mun tuamtuam a thiltungte: Gam khat leh gam khat kal, nam khat leh nam khat kal, pawl khat leh pawl khat kal, khua khat leh khua khat kal, innkuan sung ah nupa kal, unau kal, adangdang kal a buaina omte ITNA taksap ziak ahi hi. Tulai in i gam ah *itna kial*

*a kia chileng kikhial lou ding hi. Dansiammi khat in dan thu ah bang thupiak a thupipen ding chi a adotna Jesu’n, Toupa Pathian lungtang tengteng, kha tengteng, lungsim tengteng leh hatna tengteng a it thupiak thupipen leh poimawh pen ahi, a chih ban ah, a kibatpih mahni i ki-it bang a vengte/mihinpihte it ding, hiai sang a thupiak thupi zaw himhim a om kei, chi’n dawng hi* (Marka 12:28-31). Sawltak Paul in, *ki-ittuahna lou ngal kuamah bangmah ba kei un, amau mihinpih itpa’n dan a zuikimta hi,* na chi hi (Romete 13:8). Sawltak Paul mah in, *itna tel lou nasep/thilhih bangmah lou, a thawnlel ahi a chih ban ah, itna in bangkim thuak teitei, bangkim gingta, bangkim lamem in bangkim thuak khe zel ahi chi hi* (1Korinth 13:1-3,7).

**ITNA NASEP/THILHIH AHI:** I maban naichik a khovel pumpi a Khristiante’n birthday lopna programme i zat ding Khristmas pen Pathian in Amah batpih a abawl mihingte khelhna ziak a tangtawn meidil/gawtmun a pai mai dingte hon it mahmah chih nasep a hon latsakna ni ahi. Pathian in hon it ahi chih i theihna tuh a tapa tang neihsun Jesu Khrist hon piakna



tungtawn in i mu thei hi. It huaina leh deihhuaina bangmah neilou mikhial mangthang mai dingte hon itna ziak a Pathian in A tapa tang khat hon piak tuh LAMDANG ahi. Tuabang ahihman in tukum Khristmas pen nang leh ken i nu-lepa, i koppih, Tate, u-le-naute, insak-inkhang, midangte leh ei sang a haksa zawte kiang; I Lal leh Hondampa Jesu Khrist tungtawn a i neih leh i tan, Pathian itna, Kha Siangthou Pathian thopna tawh itna latsakna hun poimawhtak in zat chiat sawm ni maw! Hiai itna Khristmas ni kia hilou, i leitung khualzinna zoh matan a hinkhiak leh sepkiak ding kha gahte lak a poimawh pen ahi. Mi'n Pathian itna a koppih nakleh kha gah dang 8te a gahkiak ding genlouh-a maang ahi. Pathian itna hi a, amah tawh kizopna hoihtak (Pathian itna thil thawnpiak Jesu Khrist sangte) neite Kha Siangthou panpihna tawh itna gahsuh dia lamet ahi uhi. Pathian itna in bat lah neilou ahi chih chiamteh a nei in i hinkhua ah gahsuh ding in hanchiam ni (1Johan 4:16-21).

*Itna in a a dohzou a, a migi a, itna in a haza kei a, a kisathei sam kei; itna a ki-uangsak kei a, a huham sam kei. Amah thu a*

*chitentun kei a, a hehbaih kei a, hehsa in a omden sam kei; itna in gilou a kipahpih kei a, adik a kipahpih zaw hi (1Korinth 13:4-6). Itna nasep in i langsak hiam mimal chih kivel chiat ni aw.*

**THUKHITNA:** Lemna Kha tawh kipumkhatna i innsung, saptuam, khosung leh gamsung a hong om theihna ding in, kua hiam khat apan hong kipat ding ngak kenla, nang apan kipan sak in. Pathian na hihna tengteng in it inla, Pathian na it bangmah in midangte leng it sam in. Mimal chiat in tuabang ding in panla thei le hang, Hondampa Jesu Khrist hong pian a, Van Angel honpi te'n birthday la ngaihtak a sak uh, "*Tungnungpen ah Pathian thupi henla, leitung a a kipahpih mahmah mihingte lak ah lemthu leng hen*" chih hong tangtung in, Pathian kha vehna leh ompihna tang in, i lunggulh leh i thumna uh dawnna Pathian apan halhna hongtung ngeingei ding hi (Nasepte 3:19). Tuabang halhna diktak tunna vanzat manpha hithei chiat ding in simtute tengteng Toupa'n hon vualzawl hen aw! Tukum Khristmas manphatak leh gen neitak a na zat ding deihsakna chibai k'on buk ngal hi. ■

# BETHLEHEM A HONG PIANG KHRIST NA THEICHIANTA HIAM?

- Rev. L. Kham Kho Lun, New Lamka

**T**humasa: Khristmas hun a hong tun teng a i lop uh Khrist kua a hia? Na theichianta hia? Amah Tangtawn Pathian Tapa ahi (Jn 5: 25). Laisiangthou in Toupa Jesu Khrist Pathian mahmah ahi, chi-in gen hi. Amah Pathian Tapa hi-a, Pathian tawh pumkhat hi-a, Pathian ahi chi-in Laisiangthou in hong hilh hi. Amah zahtak-a, pahtawi-a, i biak-a, thupina leh vangletna khempeuh i piak theihna ding in theichian sem leng i ut hi. Tua ahihman in hih anuai-a thute sinkhawm leng i chi ahi:

## I. Jesu Khrist a chila “Thu” omsa-a akilaakna in Tangtawn Pathian ahihna gen hi (Jn 1: 1-3):

1. Amah Tangtawna-a “Thu” omsa (Pre-existent) ahi (Jn 1: 1a): Sawltak Johan in amah nagen in “Atuung in thu omta-a” chiin, tangtawn tuung-a omsa, bangmah omma a omsa ahihna gen hi (Jn 1: 1, 2, 14). Hih mun a “thu” (Gr. Logos) pen Khrist min leh, amah genna a kizang ahi. Laisiangthou in Jesu Khrist, “Pathian thupina taankhiakna leh Pathian hihna taktak lahkhiakna ahi” chi hi (Heb 1: 3). Hih thu in Jesu Khrist tangtawn a omsa ahihna gen hi (Kol 1: 17). Khrist, Bethlehem a hong

pianma a zong tangtawn a omsa ahi (Mika 5: 2).

2. Amah Pathian tawh tangtawn-a “Thu” omkhawmsa (Co-existent) ahi (Jn 1: 1b): Johan mah in, “Thu Pathian tawh omkhawmsa ahi” chi-in, Pathian tawh pumkhat ahihna uh gen hi (Jn 1: 1). “Thu”, Khrist pen tangtawn a Pa Pathian tawh omkhawm tawntung hi ahi (Heb. 1: 8). Hih thu in Jesu Khrist pen tangtawn a Pa Pathian tawh omkhawm tawntung-a, Pathian tawh pumkhat ahihna uh gen hi (Jn 17: 23).

3. Amah tua, “Thu” ahi-a, Pathian tawh kikim (Co-equal) ahi hi (Jn 1: 1c):

Laisiangthou in “tua thu” pen Pathian ahi chi hi. Sawltak Paul in, “Ama’n Pathian hihna pianzia nei gige hinapi-in, Pathian tawh kikim a om khiaklah a let tentun ding in sep lou hi” chi hi (Fil 2: 6). Mihingte hong it-man a Ama’ thupina leh nopsakna khelah lou in leitung a mihing a hong piang ahi (Jn 3: 16).

**II. Khrist Thukhun Lui a “Toupa’ Vansawltak-a” a kilakna in tangtawn Pathian ahihna gen hi (Pian 16: 7, 9, 11 adg. adg.):** Toupa’ Vansawltak kichi Pathian-a-Mithum-a (Trinity) vansawltak lim leh mel dungsun a Jesu Khrist kilakna ahi. Laisiangthou ah tamveipi kimu a tuate lakah Vaihawmte ah tam diak hi (Vaih 2: 1,4; 6: 11, 12, 21, 22 adg.dg). Jesu Khrist mihing suah nung in bel Toupa’ Vansawltak kilang nawn lou a, Thukhun Thak ah Toupa’ Vansawltak kigen nawn lou hi.

**III. Jesu Khrist mihing suahma-a thugenkholhte’n Pathian ahihna genchiana, tuate laka tamlou i taklang ding hi:**

1. Pian 3: 15 ah, Jesu Khrist “numei suan” a a pian dingthu genkhol in; ataktak

in tangtung hi (Gal 4: 4). Jesu Khrist tawh kisai genkholhna laka masapen hi ding a kum 4,000 ma-a kigen ahi.

2. Kisim. 24: 17ah, Jesu Khrist pian chiang a “aksi” kilang ding thu kigenkhola, tangtung takpi hi (Matt 2: 2). Tua aksi zui in mipilte hong kalsuan in amah hong bia uhi (Matt 21-11).
3. Isai 7: 14 ah, Jawlnei Isai in kum 700 ma in “nungak siangthou” sung apan Jesu Khrist hong suak dinga, a min zong “Immanuel” chih kiphuak ding chih na genkhola, tangtung takpi hi (Matt 1: 22, 23).
4. Mika 5: 2 ah, Jesu Khrist hong suah nading Judia gama Bethlehem khua hiding (Zebulon a Bethlehem, pen hilou ding) ahih dan zong kigena tangtung hi (Mikah 5: 2 cf. Josh 19: 15).
5. Phatna Late 72: 10-15 a kigenkhol Suahlam Mipilte’n thilpiak manpha tawh amah hong biak ding thu na genkhola tangtung takpi hi (Matt 2: 1-11).
6. Jeremia 31: 15 a, agenkhoh mah bang in Jesu hong pian

lai-in Herod in naupang tapi thatsak hi (Matt 2: 16-18).

7. Isai 40: 3ah, Khrist hong suah ding Chiang in a matai Thangkou nei ding ahih thu kigenkhola, tua zong tangtung hi (Matt 3: 1, 2).

**IV. Mangthangte zong a hondam ding ahihdan a khangthu in genchian hi (Lk 19: 10; Matt 1: 3- ): Sanggam, nang zong na piangthakta hia? Toupa'n nang hon hondam nuam in hong ngakngak hi.**

1. Matt 1: 3 ah, Tamar i mu hi (Pian. 38): Judah' tapa Er zi ahi. Er migilou ahia Toupa'n a that hi. Tua khit in Judah in a tapa khat Onan tawh a kiteeng sak nawn hi. Onan in lah chisuan nei utlou taget in a chi athangbawl a Toupan amah zong a that hi. Judah zi sih nung a belum mulmet ding a apai laiin kizuak kineih a tekpu Judah kiluppih sak nu ahi. A khawnung a piangthak himai thei.
2. Matt 1: 5 ah, Rahab i mu-a amah kizuaknu ahi (Josh 2: 1). Israelte a panpihdan et-in, amaute tungtawn a Pathian mu ahi maithei.
3. Matt 1: 5ah, Ruth (Ruth 4: 13ff), Moab mi (Jentel ahi),

Jesu Khrist suangtute lak a ahi. Ruth zong a khawnung a Bethlehem a piangthak hiding hi.

4. Matt 16 ah, Uria zi (Bathseba), Kumpi David tawh angkawmnu ahi (2 Sam 11). A khawnung lama piangthak hiding hi.
5. Kumpite min en lehang Kumpi hoih leh hoihlou kihelh nilouh uhi (Solomon, Uzzia, Manisi, Amon adg. dg.) Migiloupenle leh mihoih piankena hoih lelte Pathian mai ah pomtak chinglou hi (Lk 18: 9-30; Jn 3; Is 64: 6).

**Thukhupna:** Simtu ittak, Jesu Khrist na theichian taktakta hia? Na hinkhua ah aman thu anei taktak hia? Khrist thuneihna tangloui a piangthak kichi na hikha hia? Ana kivelchian in aw. I gensa bang in Jesu Khrist Pathian taktak, nang hong it man a mihinga hong pianga nangmah tan dinga hong si ahi chih na theichianta hiam? Tu mahmah in na khelhna kisik inla, Jesu Khrist na Toupa leh Hondampa in na sang mai in aw? Aman a kiang zuante bangchimah in hawlkhe ngeilou hi (Jn 6: 37). ■

# CHIBAI BUKNA LAMDANG

~ By: Upa T Khaithang

*“Non chibai bukna ka zaktak in, ka sula naungek lungnuam in a tawm” – Lk 1:44(BI)*

**T**angsam pakte muh di hong omta, khua le nidang bang mah in hong vot hiauhiau, khovot hun a zat di puanlum hoih taktak secondhand zuakte hong kipan nawnta. Lou nasemte’n kum khat nasep gah lakhawmta. Tualsuang Saptuamte lah Khristiante Nipi pen khat Hondampa hong piang lopna di chi in programme, ahoih leh anuam theipen dia bawl in kisata.

Jesu pian hunlai bangmai in nam niam zawte leh gentheite simmohna leh gelgawtna lah tawp nailou a, thahchimih di, gam apan hawlkhiaik di leh nam tamzawte leh hat zaw ten mi nuainungte khuallou a, mahni nopsakna di kia zong a, khovel a kisaklai in, mi chih Hondampa hong piang kipahpih a ahun leh nite lawm nawn dia kisak hun hong nawnta hi.

**CHIBAI:** Chibai kichi hi pu leh pa te’n ana zat lam uh theih a hi kei hi. Khanvualpha leh meltheihte, tanaute a kimuh un ka tuibuk muan in chi in kipia ua, akhat in ana muamlai ahihlele amuampen sekhe hial in kimuahna, kivaidawnta in kimuamsak uhi. Sapte apan a hotdamna thu hon puak uh i

san a pan in khut kilen a chibai hong piang a, ei Zomi te’n i zang ua, eite chindan ahong suak a, akilawm mahmah isa hi. Khovel a nam tampi leh gam tampi in leng hiai azang uhi.

I Laisiangthou telna ah Mari in asanggamnu Elizabeth a chibaibukna ah khut mah vakilen a kichibai mah ahi ding un kagel mai ka chi. Mari Khasiangthou gaisak a nau apai in khualgama om asanggamnu kiang a vahoh pah hi. A sanggamnu kiang vahoh utna aneih leng Khasiangthou deih a kuan hi ding hi. Numei ama khe a pai leh ni thum hiam, ni li hiam khawng lampi a paingai hi didan ahi. Misiamte’n agen dan un, chibai buk dia

insunga omte inkong apawt zaw uh ahi. Himahleh Mari bel Zakariah insungah va lut a chibai va buk ahi. Chibai abuk tak in Elizabeth Khasiangthou in a dim hi. Huaimai hilou in, anaupai khaguk ahita pen a sungah a tawm hi – Hallelujah!

Mari naupai pen Khasiangthou apan ahihziak mah in achibai buk pen Elizabeth Khasiangthou in a dim hi. Tuni'n ka ngaihtuah a, eite'n mi i chibai in, ahikkeileh mi'n ei ahon chibai un, bangchi'n a om ua, bangchi'n i om ua chih ka ngaihtuahna ah a lian mahmah hi. I kiittuahna uhia, i kingaina tuahna uhia, i kipahpih tuahna uhia? Thu hoih leh vualzawlna toh i kimuak tuahna uhia le!

Elizabeth Kha a dim nanana chu, ahong pau suah a, ka Toupa nu ka kiang a na hong bangchidan ahia awi? Numei sapsap di'n na hampaha ngei e! na gilgah leng ahampha hi, chiin kipahthu leh vualzawlna kampha ngen gensuah ziahziah mai hi.

**BELAMCHINGTE'N:** Toupa vansawltak in belamchingte kiangah tanchinhoih mi chih

hotdamna thu, Jesu Khrist apian na thu ahong gen uhi. I pai mengmeng di ua, eite hondamna thu hongtung, i va en ding uh, chi in ahong kuan uhi. Bethlehem a hong tun un, Mari toh Joseph, gan an piakna kuang a lum NAUNGEK ava mu uhi. Khut kilen in chibai ava buk uh chih akigelh kei, himahleh a thuzakte uh, vansawltak in agente ahilh uh a, huai achibai bukna uh ahi. Va kun uhia, va bokkhup uhia, akhut uh valen uhia chih akigelh kei, himahleh avahohna uh chibai va buk uh ahi. A va muah uh Mari chu kipak mahmah ahi chih alang a, “Mari in a thugente uh alungtang in angaihtuah a, avom gige a, a sutsut hi”. Amau chibai buk a vahoh Belamchingte le vansawltak in ahilh bangbang thute atak a avamuh ziakun Pathian phat leh pahtawi kawm in akikta uh – Hallelujah!

Jesu pianna a chibai bukna Khristmas hun ah muhthak i neitei duam, i kipak in Amah i pahtawi in hun i zang di uam? I chibai buk pen i Toupa Jesu hondampa'n bang ahon chi san de aw, i chibaibuk uh! ■

# BIBLE STUDY



**Pastor Khamkhanchin Ngaihte**, Local Pastor, EBCC Zion

**Text : Ephesate 5:1-20**

**Thupi : Vak a Khosakna**

**P**ULAKNA: Simtu deihtakte, mihing tate Pathian' ta i suah theih nading a Pathian' ta mihing hong suak Jesu Khrist min in Christmas Chibai! Kha masa in Jesu Khrist tungtawn a hihna leh dinmun thak in hinna thak hon suang a, tua hinna thak niteng hinkhua a mihinpihte tawh kal a zat ding ahihdan ina sin uhi. Paul in bung 4na a agen, adiak a bung 4:32 a agen bung 5 ah hon zom a, vak a omte khosak dingdan Chiangtak in hon gen hi.

**Bung 5:1-2: Pathian' Omdan zuite hi un:**

**HILHCHETNA.** "Huaiziak in" chih thumal in bung 4:32na leh tua i sinlel 5:1-2 zomkhawm hi. Khat le khat ki-ittuahna tuh Pathian' ta hihna kilatna thupi pen khat ahi. Paul in bung 4:32 ah, Pathian in, Khrist a i khelhnate a hon ngaihdamna pansan a khat le khat kingaidam ding in hasuan hi. Tua bang mah in, 5:1-2 ah leng Paul in ki ngaihdamtuahna leh ki ittuahna gingtute niteng hinkhua ding (present imperative) ahihdan gen hi. A hon itna ziak in Jesu Khrist Pathian kiang a kithoihna leh thillat namtui hiding a hong kipiakna pen ama deihtelna a hong kipia ahi (voluntary).

Kithoihna leh thillat "namtui", (fragrant offering) chih in Jesu Khrist hong kipiakna Pathian adia pomtak leh pomhuai ahihna genna ahi.

**Bung 5: 3-5. Gingtu hinkhua adia aki lawm leh a kilawmlou:**

**HILHCHETNA.** Paul in, Jesu Khrist tungtawn a Pathian ma a gingtute dinmun thak genna in "misiangthou" (Saints) thumal hon zang hi. A laikhak dangte a leng a zatmun thumal poimawh ahi. Hiai ah a biik in paukam tawh kisai hon taklang hi. I paukam suakte gingtu ihihna kilatna poimawh hi gige ahi. Tang 4na ah misiangthoute hinkhua adia kilawmlou, paihkhiak ding bangzah hiam

a hon taklang hi. Khatna ah, “kingaihna” ahi (fornication/sexual immorality). Ei pau a kingaihna niin i chih Greek ah porneia ahi a, kitenma hiin kitennung hileh, gamgi neilou numei-pasal kal (sex) thanguaina genna ahi (Matt 19:9; 1 Kor 6:12-20; Hosea 1:2 Nahum 3:4, Rom 1:29). Hiaibang khelhna tuh lungtang gilou apan a suak ahi chiin Jesu'n a gen (Matt 15:19; Mark 7:21) a, Paul in leng sa thilhihte lak ah a tel sak hi (Gal 5:19).

Anihna ah, “sianglou tengteng” (any form of impurity) ahi. Kingaihna (porneia) i chih sang a a uap za zaw, ngaihtuahna leh a tak hinkhua a kihhuai, sianglou genna a zat ahi tangpi. Thukhun Thak a akizatna tangpi ah i sepkiak leh sepkiaklough lungtang a utna kihhuai, thangtat utna, numei hiam pasal khelhpil utna tawh etna, sa utna kihhuaite genna thumal ahi.

A thumna ah, “huaihamna” (greed) ahi. Bung 4:19 a “sianglou chiteng” chih in a uapkhakte lak a khat ahi. Mahni tan a lungkimloughna, deikhkhoploughna, a tam zaw lunggulh tuntunna tuh

huaihamna ahi. Angkawmna i chih bang leng huaihamna chikhat ahi. Parallel Bible ah, “kingaihna leh siangthoulouhna tengteng, huaihamna toh, na lak uah a gen a leng genkhak in om kei hen” achi. Tomchik a gen in, a tamzaw sem neih utna, neih a lungkim theihloughna genna ahi. Hiai mah tuh tang 5na ah, a hon gen a, mi huaiham tuh milim bemi ahi a chi. I Khristian hinkhua hiai bang thilte tawh muhbelh a a om hetlough ding ahi.

Tang 4na, paukam tawh kisai mah a taihsan dingte ahon gen beh hi. Khristian hinkhua a gamtat, khohei leh paukam a Laisiangthou tawh kituaklou khempeuh koih khiak ding ahi. Mipi vantang muh a leng kilawmlou omdan (obscene), houlimna haihuaite, chiamnuih thanguaite (Parallel Bible) gingtute kam a pan zak ahilouh ding ahi. Chiamnuih i chih bangle amah asia ahipah kholkei maithei. Himahleh, chiamnuih hatmi a chiamteh ihilouh ding ahi. Lot hinkhua i et leh, Pathian in Sodom leh Gomorrah a gawt ding ahi chih a makpate kiang a hilh lai in, “a makpate ngaih in chiamnuih thugen bangle



ahi” achi (Gen 19:14). Pilvan huai mahmah ahi.

Tang 5na ah, a tung a gingtu hinkhua a dia kilawmlou thilte chiin a neihlough ding ahihna ziak ahon gen a, huai tuh, tuabang mite’n “Pathian lalgam ah goutan ding a neikei uh” achi. Paul in, gingtute Khasiangthou a chiamteh, gouluahpihte ana chi khinta hi (1:13-14). Hiai tawh tang 5na a, “Pathian lalgam ah goutan ding a neikei uh” chih theih buai lough ding ahi. Paul in a gennop ahihle, gingtute, gouluahpihte dia Khasiangthou a chiamteh khit hita, misiangthoute hita ihihman un i dinmun leh hihna tawh kituak a hing (gamtat khohei leh kampau ah) ding ahi chi ahi. Khrist a dinmun thak tawh kituak a niteng a hinna gingtute ading in option hilou in, ahiding mah ahi zaw.

**Bung 5:6-7. Thuginalou a khemzawh a omlouh ding HILHCHETNA.** Tuhun lai mah bang in Paul hunlai in leng, Khrist a zalenna pen mahni ut dan leh lemtang bang a zat ding ahi chi a gingtute sinsak sinsaktu diklou ana om khinta hi. Hiai tang a “thugina lou” kichi English a gelh tamzawte

ah “empty words” ahi. Sinsakna diklou, gen neilou, Pathian’ deihdan tawh kikalh, thu phuahtawmte tawh kuamah khem in om kei un achi. Khelhna nopsakna hinkhua a kibualte (thumangloute) tung ah tu damsung mahmah a Pathian thangpaihna a tun ban ah tunung a a thupi zaw sem a hong tung lai ding ahi chi ahi. Tuabang mite tuahlel leh tuah lai ding te ngaihtuah in, amau tawh kizopna ichi hiam, kithuahkhakna bangmah neikei un chiin Paul in vauhilh (warn) hi. A gennop ahihle, ginglou mite tawh kithuahlouh ding chi hilou in, anasep giloute uah va pang in va ki hel kei un chihna lam ahi zaw.

**Bung 5:8-10. Vak tate hinkhua HILHCHETNA.** A tung a tang 7na a “amaute kikoppih kei un” achihna ziak bulpi hiai ah hong kilang a, huai tuh, gingtute vak hita ahihman uh ahi. “Tuma in mialna na hi ua” achi a, mial a om hiam mial a khosa achi kei. Ephesa a gingtute kia hilou in tulai gingtute leng tel in, pianthak ma a pianken mihinna tuh mialna ahi. Pathian hon etna ah, gingtu hihma hinkhua tuh ei theihsang leh kikoihna sang a ana se zaw tham, khawk

lua ahi chih taklang nuam ahi. Gitlouna thuzawhna nuai a khosakna, i pianken himhim gitlouna ana hi ahi.

Tu'n ahiehleh, vak ahita uhi. "Toupa ah vak na hong hi uhi" achi a, amau a suak vakna hi mawk lou in, Jesu Khrist tawh kizopna tungtawn kia a vak hi ahi uhi. Pathian tuh vak ahi a, amah ah mialna omlou hi (1 John 1:5). Huaiziak a, Pathian ta hitate tuh Pathian tate om ding bang a om ding mah ahi. Hoihna khempeuh, diktatna khempeuh, thutak khempeuh (BI) te gingtute hinkhua ding ahi. "Gah" (fruit) chih thumal Paul in gingu hinkhua a kikhekna mite muh a akilatkhiaakna (outworking) a genna ahi.

Tang 10 ah, "Toupa kipahlam pomtak bang ahi hiam zong un" achi. English ah discerns achi. Musuah, theikhia, zongkhia chihna ahi. Hiai thumal "zongkhia" (discern) kichi chian/chetna (approving) hiam etkhiaakna (testing) genna leng ahi. Paul in a gen tuh gingtute niteng hinkhua a tup thupi pen ding Pathian lungkimna ahi chi ahi. Huaimah muhsuah tup ding, lunggulh a neih ding ahi. Paul in, sa a om in omta kei le

hang leng, ama kipahpih lam mi hih I tum tinten ahi ana chi (2 Kor 5:9). Huaimah tuh, gingu pichingte hinkhua ding leh, hiai mun a leng Paul in gingtute a hanthawhna ahi.

**Bung 5:11-14: Khelhna phoulaktu hihding: HILHCHETNA.** Gingu (Vak tate) te' sepding mawhpuaakna (duty) poimawh mahmah nih Paul in hon taklang hi. Khatna ah, mial thilhihte a panna neihlough ding, leh nihna ah, mial thilhihte diklough dan phoulak ding, chih ahi. Mial thilhihte tuh gah nei ngeilou chi a gen in a om hi. Tang 7ah Paul in, ginglou te tawh pangkhawm lou ding in a hilh a, tang 11ah ahiehleh gahsuang lou mial nasepte a ki hel lou ding in hilh kiik nawn hi. Tang 11na a a gen "Pan nak sang in a diklough dan theisak zaw un" achih ah, a mite gen hi masa lou in a nasep hoihloute uh gen ahi zaw. Paite pau a "theisak" kichi thumal English ah "expose" ahi a, a kilang a phoulak, taklang, genkhia, chihna ahieh ban ah, taihilh, sal, thunun chihna leng a kaww thei. Paul in agen ahiehleh, Ephesa saptuamte lak ah nungtolh a, mial nasep, Laisiangthou thutak tawh

kikalh nasepna a ana ki hel om hiding ahi. Huaiziak in, tuabangte nasepna va seppih kei unla, huainak sang in, bawlhoih a tunding kiik tupna tawh, a thilhih hoihloute uh phoulak a, lampi dik a pi ding tup a nei ding in hasuan hi. Tuabang mite' nasepte ki gen chian kei mahleh vantang zak a genkhiak lel leng zumhuai, Laisiangthou thutak tawh kituak lou mahmah ahi chih bel I thei (t12). Pathian' deihdan tawh kikalh nasepna khatpeuh genna ahi thei hi.

Tang 13na ah, Paul in vak nasep a gen a, huaituh, a dik leh diklou taklat ahi. Thil khat pepeuh, vak ma ah ahihna bangbang taklat ahi sek hi. Gingtute ading in, a dik leh diklou tehna hoihpen leh dikpen Laisiangthou ahi. Pathian thu tuh vakna ahi (Sam 119:105; Heb 4:12)). Tang 14ah Paul in, gingtute lak a khelhna hinkhua a ana bual khate, nungtolhte, thoukhia a hinkhua thak a hing ding in hasuan hi. Gingu a piching te'n a pichinglou, Khristian hindan dia kilawmlou a ana puukte phong ding a a hasuan tawh kiton in, a nungtolh, khelhna sal a ana tang kiikte mahmah thoukhia a dingtang thak ding

in sam hi. Nungzuihna hinkhua a kipanthak ding a sapna ahi (cf. Matt 26:36-46). Tulai gingtute poimawh leh taksap leng hiai khanlawhna mah ahi.

**Bung 5:15-17. Na omdan uah pilvang un: HILHCHETNA.**

Mihaite bang a omlou a, mipilte bang a om ding in Paul in gingtute hasuan hi. Pathian in gingtute pilna kha a piakna ding in ngetsak khin hi (1:17). Tu in, huai pilna hinpih ding in sinsak hi. Pilvanna ding om bel, pilna i chih khovel theih a pilna leh Pathian theih a pilna a om hi. Khovel ngaih a pilna tuh Pathian ngaih in haina ahah ban ah (1 Kor 3:19), Pathian in hiai pilna suse ding ahi achi (1 Kor 1:19 cf Isai 29:14). Hiai khovel ngaih a pilna in Khrist Khros ah killh lum hi (1 Kor 2:6-8). Pathian ngaih a pilna in bel gingtute Pathian ma ah kingainiam sak in, Ama kipahna ding a hinkhua zang ding in tha pia hi. Tuabang ahihman in, niteng omdan leh gamtat a pilvan mahmah ding ahi.

Tang 16 ah, hinkhua a pilvan a poimawhna ziak a hon gen a, huaituh, nite hoihlou ahihziak ahi. Nite (days) a hoihlouh ziak in hun i neih sunsunte Pathian adia a manpha thei

pen a zat ding chih Paul hon thukhah ahi. Hun hoihlou a, lauhuai ahihman a bitna zong a kibu mai lou a, hun muh bangbang Pathian nasepna dia zatding ahidhan gen hi. “Nite hoihlou/gilou” chih in Setan thununna a gitlouna leh thilhoihlou pung deuhdeuh, ni te gitlouna nasep a dim genna ahi. Omdan a pilvan dingdan khat Paul in agen tuh Toupa deihlam zon ding chih ahi (t17). “Hai nuamkei unla” chih “hai kei unla” hiam “mihaite bang in om kei unla” chihna tawh kibang ahi. Mihaite bang a omlouh ding dan bel hinkhua a Toupa deihlam zon pen, lunggulh pen a neih ding ahi.

**Bung 5:18-20. Kha a dim a om ding: HILHCHETNA.** Gingtute om dingdan a gen ma in Paul in omlouh dingdan a hon gen masa hi. Wine kham a omna tuh mial thununna nuai a khosakna ahi. Mial thilhihte lak a khat ahih ban ah mihaite hinkhua ahi. Sap ihihna tawh kikhom a hinna ding (4:1) hon daltu thupi pen khat ahi. “Kideklouna” kichi English ah “debauchery” ahi a, zu leh numei a kibualna hinkhua thanghuai genna a zat ahi tangpi. Zu hoihlouna agah ah kilang hi (Pau 23:29-34).

Paunakte 20:1 ah, “wine muhsit hat ahi a, zukhauh kilai hat ahi” achi hi. Huaiziak in, zu kham a om sang a Kha a dim a om zawk ding ahi chiin Paul in sinsak hi.

Tang 19 leh 20na te hilhchet dan ki naih mahmah 2 i en ding. Khatna ah, tang 19na leh 20na a kigente tuh Kha a dim a omna gah (result) ahi. Nihna ah, tang 19 leh 20na a kigente kha a dim a omna ding a a lampi (means) ahi chih ahi. Hilhchiantu tamzaw te pomdan tawh kituak in, tang 19 & 20 na a kigen hinkhua tuh kha a dimna ding lampi hilou in kha a dimna gah ahi zaw mai diam chih kei mimal pomdan leng ahi. A pawlpi ah hiin mimal hinkhua ah hileh, Pathian phatna leh pahtawi a kipahna lungput tuh kha thununna nuai a hinna kilatna ahi gige hi. “Phatna late, Pathian late, khalam late” kichi te a tuam chiat gen ahisang in, Pathian phat a biakna leh pahtawina tungtawn a khat-le-khat kithapiakna lam genna hi ding hi. Tang 20 ah kipahthu gen ding a hasotna thu i mu hi. Kipahthu genna hinkhua tuh gingtute khalam hinkhua kilatna ahih gige ding ahi (Phil 4:4). Paul hinkhua leng kipahna hinkhua ahi. “Bangkim tunga

kipahthu gen gige” chih in a nuam ahaksa tung ah, hun teng a kipahna lungput neih gige ding ahih dan hon sinsak hi (Phil 4:4).

**CONCLUSION.** “Vak diktak, mi chih kiang a vakna pia, khovel ah a hong pai lel ahi...amah kipahpih a pom, a min gingtate tengteng kiang ah Pathian tate suahteihna apia” (Johan 1:9, 12). Gingtute vak tate ihi uhi. Vak nasep tuh thil diklou taklat

ahi. Huaimah gingtute nasep ding poimawh ahi. Mial nasep khatpeuh a panna neihlough ding kia hilou in, a diklough tan taklat ding i mawhpauk uh ahi. Tulai I gam a i taksap mahmah khat hiin i thei. Diklou chih thei gegu napi a taisan ngam mahmah lou, koih khe ngamlou, tawpsan ngamlou, va pang guigui teitei te ihi uh. I vak midangte muh a avak ding ahi. Tuabang gingtu, tang tung a khua om bang hiding in Toupan hon vualzawl hen. ■

**BAWLDIKNA**

Khalui KTZ issue a kipahthu genna a H Muangoulian s/o H Nengkhanlal Kanaan Veng a om in a khaloh lak masakpen TBUC, EBCC Kanaan, a apiak pen TBUC EBCC Muallnuam hong kichi a poi mahmah, hihkhelhna tung ah a petu leh tualsung saptuam in hon ngaihsiam uh editorial board in ka hon ngen uhi.



**Gammial Aw**

*Gamsung buaitak lak a khosa a kalsuan i hihlai a field tungtawn a Pathian Mission i sepna kumbul January apan kumtawp December tan pangkhawm a i sepna report a hunhun a pethei a i om man in kipahhuai i sa a, tuni dong honpi i biak Pathian thupina tengteng i khusak hi. Kumbul apan field tungtawn a i kalsuannate enkik le hang, Pathian in lamtuamtuum a honpi dante thupi i sa mahmah hi. Tu kumkhat sung a Pathian honpi nasate ziak a kipahthu gen in, kumthak a semtute leh thilpiak leh thumna a na pang gige saptuamte'n naaksem a pang a kalsuan nawn a hih theihna ding a thumna toh delhzui ding in i kingen hi. Field tungtawn a report i kaihkhawmte leh pawldang toh i sepkhawmna a i kalsuannate a nuai a bang in enkhawm nawn ni. Toupa'n Khristmas 2024 leh Kumthak 2025 Khamuang leh Kipaktak a zangthei chiat ding in hon vualzawl chiat hen aw.!*

## A. HIMALAYAN MISSIONS FIELD

### KIPAHTHU GENNA LEH THUMNA DINGTE:

1. Toupa'n i sepnate hon vuaksuaksak lou a, tukum paisa sung in leng gingthak leh baptisna tang tamtak hon piaksate ziak in kipahtu gen ni. Khudunabari, Himkchim, Namluwa, leh Pathari te ah leng gingthak khat chiat Toupa'n hon piaknawn ziate in kipahtu gen ni. Gingthak leh baptisna tangthakte i na thumpih zel bang in, amaute'n a khalam kalsuanna ding ua Khasiangthou makaihna leh ompihna a tan ua, nungzui muanhuaitak a hong hih theihna ding un thumpih ni.
2. Khateng a Pathian vualzawlna tatsatlou a gah i muhzelte ziak in kipahtu i sa mahmah hi. Pathian kha ompihna toh semtute'n chidam leh lamzangtak a hon sepzom zel ua, Ministry a vanzat ding a kul-le-poimoh om bangbange a hunhun a piak a om theihna ding un thumna in phawk ni.
3. Gingtute a ding a hun poimohtak Khristmas hongnai nawnta ahihman in, hiai hun manpha suam a, semtute leh saptuamte'n tangthupha puanzakna hun in zatnawn sawm uhi. Semtu mimal chiat lungtang ah Toupa apan A deihdan theihsak a hihna ding uleh khamangthang dingte itna leh veina taktak toh gahsuahtak a sepsuah ahih theihna ding in thum ni.
4. Semtute'n Hetauda Station ah gingtu innkuan khat toh kikhopna pantheita uhi. Kipahtu gen in, maban a gingtu hong kibehlap zelna ding leh fellowship pichingtak neih ahih theihna ding in thumna in phawk ni.
5. NEBC sung a Local Committee, Dorka Committee leh semtute a ding in Leadership Training, Taanggam a omte a ding in November 14, 2024 in Ektin Biakin ah neih in om a, Phaizang mun a omte a ding in November 17, 2024 in Pathari Biakin ah neih in om hi. Hiai kisinsakna hun in Rev T Paununsang, Field Superintendent, Dhemaji leh Rev G Thangsanglian, Field Coordinator, Assam Field te kizang uhi. Hiai kisinsakna hun a telkha khempuhte'n a omna saptuam chiat ua manphatak a sinsakna a ngah bangbange uh a zatkiak theihna ding un thumna toh delhzui ni.
6. Field a semtute tungtawn a Pathian thu genpih a omte lungsim a Khasiangthou in na a sepzom zel theihna ding in thumna in

phawk ni. Tukum khat sung a semtute kalsuanna tungtawn a Pathian in gah thupitaktak hon piakte ziak a kipahthu gen in, kumthak a semtute'n kum a thak toh kiton a naksem a pang a khamangthang tamsem Jesu Khrist khebul a hon piilut kum uh ahiththeihna ding in thum ni.

## **B. DHEMAJI MISSIONS FIELD**

KIPAHTHU GENNA LEH THUMNA DINGTE:

1. Toupa'n semtute tungtawn in November 05, 2024 in Namgharia Study Centre ah naupang giat(8) baptisna tangthak hon pia hi. Kipahthu gen in, amaute a innkuan sung adia gingtu masapen hong hi ahihman un thumna in delhzui ni.
2. Gingtu khenkhatte neektak zonna toh kisai in mundang a omkhia a nektong ding a kuan omthei zel uhi. Amaute'n a nasepna lam ua vakthap mailou a, gin omtak a ginna uh hon letkip paisuak zohna ding un thumpih ni.
3. Field a Study Centre i neihte buaina leh nawngkaina bangmah omlou in paitou thei zel, kipahthu gen ni. Hostel-cum-Training Centre a naupang kep a omlette leng naupang dangte sang a chituam zaw leh fel zaw a aom theih man un kipahhuai i sa mahmah hi. Pathian ompihna toh gahsuh leh lohchingtak a hong paizel theihna ding in thumna in delhzui ni.
4. Bongalmari a om, Mrs Noyonti Taw gingtu muanhuai a kinei ahilh lai in, a mounu damtheihlouna pansan in a sungkuante'n kikhop ding phal nawnlou uhi. A ginna hon letkip paisuakna ding in thumpih ni. Mr Bijoy Narah leh a inkuante kiang a semtute'n counselling a neihpihna tungtawn ua thutak, lampi leh hinna Jesu hon saan theihna ding un thumpih ni.
5. Kopsan a om Mr Top Doley, Mrs Dipti Rani Doley leh Ms Kaum Doley leh innkuante houlimpihna semtute'n neilel uhi. Jesu Khrist kia a hotdamna om ahihdan hon theih ua, khalam leh salam damna hon neihna ding un thumpih ni.
6. Naupang Miss Sornoli Doley, Namgharia Study Centre a kai in baptisna tan a lunglut ban ah biakna hunte ah kihel zel mahleh a innkuanpihte gingtu hilou ahihman un, lemthei nailou hi. A ginna a hong dinkip a, baptisna a tan theihna ding in thumna ah phawk ni.

7. EBCC Lachangaon a gingu Mrs Anjona Panging, Mr Higa Regon, Mr Paulap Doley te'n damlouhna tuak ahihman un, amaute'n taksa leh khalam damna hon neih theihna ding un thumpih ni. Ban ah, Bitarbacha a om Moina Panging nu-leh-pa te'n damna hoihtak hon muh ua, Pathian lam a hon ngatna ding un thumpih ni.
8. Namgharia Study Centre a naupang omte lak a bangzah hiam biakin kai thei gige ua, amaute'n Jesu Lal leh Hondampa a pom in kilatna leng nei thei uhi. A ginna uh hong pichin theihna ding in thumpih ni.
9. Pityang Chapori a om, Mr Sanjib Doley leh Polo Pegu, ban ah Amguri a om Kirosh Kuli leh Morahuti a om Dimpi Taid te counselling neihpih lel in om ua, amaute'n Jesu Khrist Lal leh Hondampa dia hon saan theihna ding un thumpih ni.
10. Field a gingu tuailaite lakah Laisiangthou sin lunglut, Missionary leh Pastor lunglut bangzah hiam om uhi. Amaute hoihtak a makaih hong hih ua tunung a atup-le-ngimte uh hon taksuah theihna ding un thumpih ni.
11. November 10, 2024 in Dhemaji Missions Field Khawmpi, Kareng Chapori mun ah neih in om a, 'Kipumkhatna'(Ephesate 4:3) chih thupi pansan in thugenna hun Rev G Thangsanglian, Field Co-ordinator, Assam Missions Field in zang hi. Khawmpi hun in mi 400 vel paikhawmthei ua, thumnate ziak a khawmpi manpha leh lohchingtak a zoh a om thei ahihman in kipahtu gen ni.

### **C. HOJAI MISSIONS FIELD**

#### **KIPAHTHU GENNA LEH THUMNA DINGTE:**

1. Home Tuition tungtawn a naupangte lak a nasepna semtute'n sunzom thei zel uh, kipahtu gen ni. Naupangte lak a home tuition lamzang leh gahsuahtak a hong paizom zel a, tangthupha genna ding a vanzat poimoh hong hih theihna ding in thumna in delhzui ni.
2. Field a semtute kalsuannate subuai thei leh haksatna tunthei tapi omte lak ah, tuni Chiang Dong Ministry subuai ding zen a semtute'n haksatna tuaklou ahihman un kipahtu gen ni. Maban a Ministry lamzang a hon sepzom zel theihna ding un thumpih ni.



3. Semtute'n naupangte tungtawn a anu-le-pate uh houlimpihna a neihzel uh vuaksuak lou a, gahsuahtak a hon sutzop zel theihna ding uleh houlimpih aihna tungtawn ua Jesu Khrist hondampa ahihdan hon theihna ding un thumpih ni.
4. Hojai a gingu innkuan nih leh tangval khat i neihte salam leh khalam a hong pichin semsem na ding uleh field a ding a khuam muanhuai hong hih theihna ding un thumpih ni.
5. Field ah semtute tungtawn a Pathian thu houlimpih theih ding gingu mite piak a i om zel man in kipahhuai i sa hi. Amaute houlimpih aihna tungtawn ua Pathian in a lungsim uh hon kheksak a, Jesu Khrist kia Hondampa a hih dan a theihna ding un thumna toh delhzui ni.

#### **D. GOALPARA MISSIONS FIELD**

KIPATHU GENNA LEH THUMNA DINGTE:

1. Goalpara station pansan a semtu Evan T Nengminlun, Evan NK Naulak leh Evan Kamkhenthang te'n Pathian ompihna toh doudalna leh nawngkaina omlou a semzom thei zel uh, kipathu gen ni. Innkuan chidamna hoihtak toh hon sepzom zel theihna ding un thumpih ni.
2. Dhupdhara Station pansan a semtu Evan K Kamkhenthang in maban a Football Coaching Centre pat a sawm lamzangtak a hon taksuah theihna ding in thumpih ni. Football coaching pat ding ngaihtuah kawm in tulel in tua mun a na omsa Dhupdhara Women Football club-te va panpih in niteng in vakuan zel a, mite toh va kimeltheih panta ahihman in manpha i sa a, thumna toh delhzui ni.
3. Pathian in Rabha mite lak a tanchinhoih gentheihna ding kong zatak a hon honsakna ding leh semtute tungtawn a khamangthang hon piakna ding in thum ni. Tu-le-tu in field apan agah muhding om naikei mahleh, Toupa'n akal lak a houlimpih theih ding mi hon piakzelte ziak in kipathu gen ni.

#### **E. KAMRUP DISTRICT, ASSAM**

KIPATHU GENNA leh THUMNA DINGTE

1. Toupa kepbitna toh semtute'n Ministry buaina omlou a sunzom theizel ahihman un kipathu gen ni. Semtute'n

- Pathian apan pilna leh sepsiamna hon neih ua, gahsuaah leh lohchingtak a hon sepzom zel theihna ding un thumpih ni.
2. Toupa'n semtute a hunhun a houlimpilh theih mi honpiak sakzel ziaak in kipahtu gen ni. Houlimpilh a omkhate'n Pathian hing hon theihna ding un thum ni.
  3. Mr. Saturam Rabha kichi tanchinhoih semtute tungtawn a genpilh thei in omta a, Mr. Doniram Rabha kiang ah leng tanchinhoih gen sutzop ahilh theihna ding leh amah leh a inkuante a lunglut theihna ding un thumpih ni. Maban a semtute'n a kalsuannate uh hon sutzop zel theihna ding uleh houlimpilh khak a omte lungtang Toupa'n a hon honsak na ding in thum ni.

## F. PAWLDANG TOH SEPKHAWMNA

1. Pathian ompihna toh kumkhat dang bang pawldang toh i sepkhawmnate ah haksatna leh nawngkawina omlou a lamzang leh masawn in i paithaih man in kipahtu i sa hi. Tu kumkhat sung a Pathian in honpinate ziaak a kipahtu gen in, kumthak i maituah ding a leng lamzang leh gahsuahtak a sepkhawmna hong paizom zel theihna ding in thumna in delhzui ni.
2. Pawldang toh sepkhawmnate enkainatu Rev G Thangsanglian, Field Coordinator, Assam Missions Field in International Partnership Facilitator mohpuakna toh lenkhawm in Guwahati pansan in tuni chiang chidamtak in semzom thei zel ahilhman in kipahtu gen ni.
3. Overseas Missionary Frontier (OMF) toh sepkhawmna ah kum kua (9) bang melmu theita a i om man in kipahtu i sa mahmah hi. Tulel in, Missionary Innkuan khat; Rev N. Khaikhuphang leh Innkuante Thailand a kuan i neilel a, amaute'n tulel in station mun thum; Naimueang Station (Singburi Province), Banphet Station (Angthong Province), leh Phromburi Station (Singburi Province) ah Ministry nei in kalsuan lel uhi. Pathian ompihna toh lamzang leh lohchingtak a hon sepzom ua, gingtu tamsem amaute tungtawn a piak a i omna ding in thumna ah phawk ni.

4. Worldwide Evangelization for Christ (WEC) toh sepkhawmna ah leng tukum chiang in a kum giatna (8) tan bang melmu thei a honpi i biak Pathian tung ah kipahtu gen ni. Pathian hoihna ziak in, i sepkhawmna ah i louma a gamkuan khia Missionaryte'n Ministry tuamtuam a manphatak a kihel in, chidam leh lamzangtak in a maban chiat uh sunzom thei uhi. Tulel a gamkuan khia i neihte leh a kuanna gamte uh ahihleh; Ms Angela Lunhoih Hauzel (Myanmar), Ms Niangnemkim (East Timor), Mr Enkhamson (Gambia, Africa), Mr P. Goudinglian (Laos), Mr S. Lianthianlal (Cambodia), Mr Hemsing Engti (Cambodia), Thianminlian Valte (China), Mr T Jamsuanmuang (China), Ms Ningngaihchiin (Chechnya, Russia), Khai Johnpaul leh Ngaibiakkim (Varanasi, UP), Nemhoihkim (Varanasi, UP), S Thangngaihnm (Asha Bhavan, Kolkata), Ms Chiangkhanlun (North Mecedonia), Mr H. Ginkhenthang & Vungngaihnm (Laos), Alice Niangbiakhoih Guite (Guinea Bissau), Mansiankim (Guinea Bissau), N Lunkim (Vietnam), Mrs Zamhoihkim leh Mr Kedar Ujha (Nepal), Ruby Lianroumawi Saikia (Kazakhstan) leh Chingngaihmuang (Indonesia) te hi uhi. Pathian ompihna toh lamzang leh lohchingtak a maban hon sawnzal theihna ding thumna tampi toh delhzui ni. ■



# DORCAS

*Corner*

## KIPUMKHATNA VUALZAWLNA BUL AHI

Hunte tuibang a luang in awlawl in hon tonpih a kumtawp December-2024 Krismas kha hon pikainawn Hondampa Jesu Khrist min in Krismas chibai k'on buk hi.

'Ngai in, unaute kituak diamdiam a omkhawm a nakhoih in a nuam mahmah hi. Lu a thau manphatak, khamul a luangkha, Aron khamul ngei a luangkha a, a puanaktualmong a luangkha bang ahi. Hermon daitui chim Zion tangte a kezel bang ahi; huai ah Toupa'n vualzawlna thu a pia a Tangtawn a hinna ding ngei' (Sam 133:1-3).

Pathian vualzawlna lam chituamtuum a dong i ki chihlai in bangziak a dong ka hia? chih ngaihtuah tham ching a hi. Vualzawlna don dan a kibangvek kei ding a, a deihlou leng ki-omlou ding hi. Pathian vualzawlna mihing lunggulh bangbang dongtu apan ding tuh uthuai mahmah hi. Tuabang vualzawlna i muhtheihna ding in kipumkhatna a poimoh pente lak a khat chinuam i hi. Ei mimal Khrist toh kipumkhat masak phot a amah toh kizopna a om peuhmah leh midangte toh kipumkhatna omthei pan hi. Tua kipumkhatna gingu Pathian mite lak a hong om chiang in vualzawlna lam chituam tuam a kidongzel hi. I Laisiangthou changtel ah David in gingu lak a kipumkhatna hoihna leh a manphatna hahgen mahmah hi. Aron khamul a sathau luangkha toh tehpih in huai ah Pathian ompihna leh a vualzawlna ensak hi. Huaiziak in kipumkhatna poimoh petmah hi. Ball pekte'n a lang lam ua goal khum ut a a hahpan mahmah banglel a hikei a, i Toupa Jesu Khrist thupiak zuihteitei ding ahi. Jesu, a PA Pathian kiang a a thum bang in, "Pa, nang keimah a na omleh, kei nangmah a ka om bang in, amau leng eimah a omna ding in; nang kei n'on sawl chih khovel in a theihna ding in. Huan nang thupina n'on piak ken amau ka peta; amau pumkhat ahihna ding un, ei pumkhat i hih mahbang in. Kei amau ah, nang kei ah, amau pumkhat a a om ua a bukim theihna ding un; nang kei n'on sawl chih leh n'on it bang in amaute na it chih khovel in a theihtheih na ding in (Jn.17:21-23).

### **Kipumkhatna vualzawlna bulpi a hihna ziate:**

1. Kipumkhatna in khat leh khat ki-ittuah i hihna a genchiang hi: I ki-ittuah chiang in Pathian vualzawlna muhtheih leh muhtheihlouh ah kitang hi. Jesu Khrist nungzui i hihna leng tua ah chiansem in midangte'n leng mu uhi. Na ki-ittuah uleh mi tengteng in ka nungzuite na hi uh chih hiai ah a thei ding uh, a chi hi (Jn.17:35).
2. Kipumkhatna in Kham hinkhua hatsak hi: I lak a kipumkhatna a omchiang in khentuam omlou in kuapeuhmah i kihanthawn a ginna ah i kilamtou theizel hi. Jesu Khrist sisan ziate a tatna i tan tungtawn in amah vang a kitungding in kham ah i khangthei hi. Pathian in thangpaihna thuak ding hilou in, Toupa Jesu Khrist sisan ziate a hotdamna muding zaw in a honchi hi. I hah in leng i ihmud in leng, amah toh i hinkhawm theihna ding in

i sihsik in a mah a sita hi. Huaiziak in kihanthawn chiat in, na hih nak mahbang un kitungdingtuah chiat un (1 Thess.5:9-11).

3. Kipumkhatna in Pathian thilhihtheihna puangkhia hi: Thilhihtheihna Pathiana ahi. Thuneihnaleng Pathiana ahi. Pathian itna vang a gingtute i kipumkhat chiang in Pathian thilhihtheihna leh a thuneihna eite'n leng i theithe i a thilhihtheihna leng hon pia hi. Tua Pathian hihna leh thilhihtheihna te koppih a hamphate i hi hi. "... leitung a bangpeuh na hen uh, van a hen ahi ding. Huan leitung a na phel uh, van ah phel ahi ding hi. Chihtaktak in k'on hilh nawn hi. Leitung ah na lak ua mi nih a thilnget ua a kithutuah uleh, ka Pa van a om hihsak in a om ding uh" (Mat.18:18-19).

Kipumkhatna vualzawl na bul ahi i chih lailai in kipumkhat ding hon dalthei i niteng hinkhua ah a tam mahmah hi. Tuate mimal kisaktheihna leh eikia hoih kisakna bang, kingaihdam louhna bang, deihdan leh utdan kibatlouhna leh kihoupih utlouhna neuhneuh, thil houchikchik khawng in hondal khathe i hi. Himahleh tuate i tuahkhak a hon buaisak dek chiang in kingaihniam a midangte manphatna mu a ngaihsiam kisin gige ding ahi. Kuahiam hon lungnuamlousak a omtak leh leng Khrist ngaihdamna ngaihtuah kikkik a ngaihdam kisin ding ahi. Thuhoihte gen leh kingainiam tak in mite houpih in thumkhawm in khat leh khat kituak a hinkhawm ding lunggulh in Pathian vualzawl na tamsem i muhtheihna ding in sem khe ni. Toupa'n hon vualzawl hen.

### **BDC – BAPTIST DORCAS COMMITTEE**

Baptist Dorcas Committee i chih mawltak a gen in Dorca Pawl chihna ahi. Dorca – Numei chihna ahi a, Numei Pawl leng a chih theih hi. Numei Pawl min genna leh a makai ding a telte Baptist Dorcas Committee chih minvoh ahi.

**A gelhdan toh kisai:** Eipau a i gelh leh Dorca Pawl, Baptist Dorca Pawl hilel di. Tomchik a gen a eipau a gelh chia 'k' Dorca zat di; saupau a gelhchia 'cas' Dorcas gelh di a hi. BDC a gen buaibuai louhna dia Dorca Pawl chih ziang ding ahi (*Eg: program khat peuh ah*).

Gelhdan diklou – Dorca Comt/Dorca Pawl/Dorkas Pawl/Dorkas Comt. Gelhdan dik - Dorca Committee/ Dorca Pawl Dorcas Committee ■



# YOUTH *Corner*

Mangthang ding mihingte hongtan ding a leimun niampen a hongpiang pah ding i Hondampa leh Toupa Jesu Khrist itna toh simtu te tengteng chibai ka hon buk masa hi. A hehpihna leh zahngaihna ziak a tukum a ding a akha tawpna tan a honpi i biak Pathian tung a kipahtu gen in amah thupina i pe masa ahi.

Tukum sung pumpi Kipumkhatna chih thupi a nei in kigen tamta, kiza tamta: Bang chi gen a bang zat beh ding om tuan lai di a diam? Ahi a, i KIPUMKHATNA gen uh bangchi bang ahi de aw? I lamet uh; i lunggulh uh; thumna a i nget uh- bangchi bang KIPUMKHATNA a de aw? Kipumkhatna chih i gengen pen leng: Hotel houlimna a kigen pen maw? Whatsapp group a kigen pen maw? Newspaper khawng a kigelhte hi hia? Nang lungsim a om pen bang ahi dia? Saptuamte'n i gen pen: Bible a kigen? Koi ah? Kipumkhatna kichi Pathian a kipan eite a ding a thilpiak thupi leh manpha pen ahi. Hiai kipumkhatna pen Pathian in Ama tate hiding, inkuan mi hiding leh Ama pumpi hiding a hon gakkhawmtu ahi, Kipumkhatna kichi sapna kibang, hihna kibang leh kipumpiakna kibang gah i suah ua huai in Saptuam diktak, theihpihtu diktak leh khotang diktak i hihna midangte muh ding a i taklatna leng ahi.

Melma in tua bang a om a i hong khan leh hat a Pathian gam i kek ding lau ahihman in kituahlouhna leh kikhenna khovel a chituh in mihingte hon pimang in om lel hi, huchi ahihman in hiai bang kipumkhatna bangchi ngah ding? Bangchi'n hiai bang chouna, zeetna leh khemna i mualsuah thei dia? Bangchi'n khat-le-khat kikal a khamuang leh kituaktak in pumpi khat bang in i hing khawm thei dia? chih datna kibawl in ngaihtuahna pekhawm leng uthuai mahmah hi. A dawnna Laisingthou a muh ding om hi, Laisiangthou kichi thutak kia hilou in kipumkhatna laibu leng ahi. Hiai Laisiangthou in Pathian in mihingte muanna leh itna toh khat-le-khat hingkhawm ding a Pathian thiltupte hon lahna

omsun ahi. Laisiangthou ah Pathian tate muntuam leh hun tuamtuam ah kipumkhatna thilhihtheihna a tuah leh muhte muh ding om hi. Huai mah tuni a gingtute'n i etton leh zuih ding hon sinsak hi gige ahi.

Mark 6:7-13 ah Jesu'n a nungzuite samkhawm in Tanchinhoih gen ding in sawlkhia hi, tua bang a asawlkhiak lai in nih nih a kizui ding in sawl hi. Nungzuite amau kia hilou in pawl in kalsuankhia uhi, khat-le-khat kihanthawn ding, kipanpih tuah ding, thumkhawm ding leh a hihtheihthe sungkhawm ding, puakgik leh kipahnate genkhawm ding, kihuhthuah leh hatlouhna a leng kihanthawn a, khat-le khat kimuan ngam a thupukna bawl khawm ding a sawl ahi uhi. Hiai in hon sinsak nop bel i tup leh ngimte, i missions leh nasepte mualsuahna ding in pankhawm a kipumkhat a kalsuankhawm mah poimoh ahihdan kimu hi. Amaute khat-le-khat kihuhthuah ua, kidemthuah leh kihektuah a omlou in a lohchinna ua kipakkhawm in kalsuan khawm uhi.

Korinth laikhak khatna ah saptuam sung ah kikhenna thupi tak piang in guptuam leh zuihtuam bang nei ua amaulak a kituahlouhna leh kikhenna piang ding dinmun a omlai in sawltaklian Paul in 1Kor 1:9 “Huan unaute aw, na vek un thu kibang na gen ua, nalak ua kikhenna himhim a omlouhna ding in lungsim munkhat leh ngaihtuah munkhat a diktak a na kizop chinten zawkna ding un Toupa Jesu Khrist min in k'on ngen ahi.” chin laikhak hi. Gal 3:28 Huai ah Judami a omkei a, Grik mi leng a omkei; huai ah sikha a omkei a, noplen leng a omkei; huai ah pasal leh numei leng a omkei hi. Khrist Jesu ah na vek un pumkhat na hi uhi.

Saptuam hong kipattung in nungzuite a gingtute lungsim munkhat ah omkhawm in, thumkhawm ua kuamah khenzoh leh nanzoh in omlou ua hong hat in khang mahmah uhi, Nasepte 1:32 “Huan a gingta mipite lungsim munkhat leh ngaihtuah munkhat in a om ua: a lak ua khat in leng a thilneihte, kei a tuam ahi, a chi kei ua, thil tengteng a kikop uhi.” Laisiangthou a kipumkhatna in khanna leh hinna om ahihdan tangthu sinlai muh ding tampi om hi, tuate gingtu kichi nang leh ken i zuih ua i etton ding a Toupa hon sinsak nop ahi, i inkuan ah maw, i khotang ah maw, i gam leh nam sung ah Pathian min thupina ding leh a gamkekletna

ding a tua bang a gingtute kihek leh kidemtuaah mailou a lungsim munkhat toh kipumkhat a kalsuan khawm ding poimoh mahmah ahi Sam 133:1 ngai in, unaute kituak diamdiam a omkhawm a nak hoih in, a nuam mahmah hi! chih manghilh kei ni.

Simtu tengteng Khristmas i lop tungtawn in khat-le-khat kipumkhat chiat ding in leh a vualzawlina hoihpen toh Kumthak 2025 Toupan honpi galkai hen chih deihsakna ka hon khak hi. ■



## EBC Innsung Thu

### **EBCC, AIZAWL DINTHAR – HOTDAMNA CAMP REPORT:**

EBCC, Aizawl Dinthar in Hotdamna Camp October 29- November 02, 2024 neih ding a gel a om bang in Camp lohching leh gahsuaah tak a zat zawh hita hi. Hiai hun a thugenpi in Evan. T Damkhothang leh Mr. Elson Thanglungmang Guite pang uhi. Camper ahiehleh papi, tangval, nupi leh nungak, avek a gawm in mi 57 pha hi. Hiai camp tungtawn a khalam a pianthakna tang/hotdam hih kitheihchetna nei mi numei leh pasal a gawm in mi 18 pha hi. Toupa min phat in om hen! Midang 39 ten kilatthakna neithe chiat uhi. Hiai camp a ding a thumna a na pangte, thilpiak leh lamchi tuamtuam a panlate tengteng tungah Toupa min in kipahtu ka hon gen uhi. Toupa kia in thupina tengteng tangta hen, AMEN.

- **T/Upa PH Vanlalmuan**, *Camp Secretary, EBCC, Aizawl Dinthar.*

### **MUSIC TRAINING REPORT:**

Saptuamten Toupa gamna i sepna uh NEBC sung ah vualzawlina lam chi tuamtuam muh leh tan theih zelna dia lampi kong hon honsak i biak Pa Pathian min in simtu it takte Chibai! Nepal Evangelical Baptist Convention sunga Field Baptist Youth Fellowship ten, tuailaite lakah Pathian biakna leh phatna lamah khantouh semna ding ngimna in tukum paila a sepkiak dinga Year Plan a ana koih uh, Music Training manpha taka



zoh ahihtheih tak ziakin Pathian tung leh thumpihtute tung ah kipahna lian mahmah hi. Hiai Music Training pen nisim 21-26<sup>th</sup> October 2024 sung Birtamode mun ah neih ahi. Hiai hun in sinsaktu dingin heutute deihsakna toh heutupa Mr Thangbiaklal Valte, Music Promoter hongkuan a, NEBC sunga om Saptuam leh Fellowship tuamtuamte apan tuailai mi 46 amun ah kikulh in sinsakna piak ahi. Amaute, Tonic Solfa, Guitar leh Keyboard te sinsak ahih ban uah, Biakna leh Phatna toh kisai leng hilhkhawm ahihman un lungkim thei mahmah uhi. Adiak in, mi a tamzawte a dinga Tonic Solfa a zilkhak patna uh ahihman in ki thalawp in nuamsa mahmah uhi. Hiai kisinsakna in tuban hun bangtan hiam sunga Saptuam sungah gah hon suan ngei ding lamet ahihmanin ki lungkim in Pathian tungah kipahna lian mahmah hi. Vanzat manpha tak a hong hih theihna ding un thumna ah delhzui ding in tha kon chial ngal hi. Toupan hon vualzawl chiat hen aw.

- **Rev Dr. Thangminlun Mangte**, *FS, Himalayan Missions Field*

## **NAUPANG CHIALPINA LOHCHINGTAK IN ZOU:**

EBCC Suangdoh a department poimoh mahmah BCD in Year Plan a, Naupang Chialpi neih diing chia a guan uh apaisa October 24 – 27, 2024 sung in EBC Headquarters huhna toh Pathian piina leh kepna ziak in lohching leh gahsuahtak in zoukhe ta uhi. Chialpi hunsung in Rev M Ginminthang Child Co- Ordinator EBC in thutak genna nei a, Htp. Lianginmang M.Div in Biakna leh Phatna makaih hi. Chialpina hunsung in naupang hunkhop piangthak, hinkhothak pan diing a kisa leh hinkhua siangthou zang diing a thupuukna bawl om uhi. Hiai Naupang Hotdamna Chialpi tungtawna, Toupa' Pathian in thil thupi leh manpha ahon hihsak man in ka kipaak mahmah uhi.

*Thupina tengteng Pathian kia in tang hen.*

- **Khup Lianlal**, *Secretary TBCD/EBCC Suangdoh*

## **SECOND COMING CHIALPINA & BYF DAY LOHCHINGTAK IN ZOU:**

Pathian hoihna leh amakaihna ziakin "TUAILAITE' NI 2024" gahsuahtak leh manphatak in zatzoh ahi. Hiai hun ah Rev. V. Thangkhanmuan, Youth Co-Ordinator EBC in "NA PATHIAN

TUAKDI'N MANSAN OM IN" chih thupi pansan in "Second Coming Hotdamna Chialpi" in thugenna 6zang a, Pathian khasiangthou pina, ompihma leh makaihna ziakin programme gahsuah leh manphatak in zatzoh ahi a; Thugen tungtawn in Jesu Khrist Lal leh Hondampa dia sangthei bangzah hiam omban ah, khalam halhthakna tanga kipiakhakna tang leng tampi om hi.

Hiai TUAILAITE' NI zatna tungtawn a gah manphatak muh ahihman in KTZ tungtawn in ka kipahna uh kon taklang uhi.

- **Lianbiaklal**, *BYF Chairman, EBCC Lungchin.* ■

## Dotna leh Dawnna

**Dongtu:** Upa J. Kaikhanmang Guite, Vengnuam, New Lamka

**Dawngtu:** Rev Gin Malsawm, Principal, GBC

### DOTNATE:

1. Paite Laisiangthou Laibute ah TOUPA leh Toupa, TOUPA Pathian leh Toupa PATHIAN chi a gelhna mun a om sek a; bangchi munte a LAIMAL LIAN leh koimunte a laimal neu kizang, LAIMAL LIAN leh laimal neu bang genna hi hiam chih hon hilhchiang ding in ka hon ngen hi.

**Dawnna:** Laisiangthou a Pathian min (personal name) te YHWH in kigelh a, a chituam bikna kepbitna ding in sappau in LORD chi leh eipau in TOUPA chi in kilet hi.

YHWH Adonai / Adonai YHWH te, ahi bangbang (literal) a let hile hang TOUPA Toupa chih ding, Sappau in the LORD God chi in kilet a, eipau in TOUPA Pathian hiam Toupa PATHIAN chi in kilet hi. YHWH thumal a masak leh nunung dan a zil ahi.

2. Thukhun Lui Laibute ah TOUPA a kizang a, Thukhun Thak Laibute ah Toupa a kizang tangpi hi; bangziak ahi dia??

**Dawnna:** Thukhun Lui Laibute ah Hebrute laimai YHWH te TOUPA in kilet hi. Thukhun Thak Laibute ah Hebrute laimal hinawnlou in Greek laimal Kurios kizangta ahihman in Toupa chi in amau gelh dan zui in kigelh hi. Thukhun Thak a Toupa chih thumal kimuhnate personal hilou in generic ahi hi.

*Note: YHWH, Adonai, Kurios te Toupa chi in kilet vek hi.* ■

# Thu Tuamtuam

## **KIPAHTHU GENNA:**

Miss Kimnunlian d/o T Tanzamuan in SBI ah sepna amuh Toupa vualzawl na zia ka amuh ah ih kiphawkin, Pathian kianga a kipahtu genna in a khaloh lak masak pen apoimawhna bangbang a zat ding in TBUC, EBCC Mata ah hon pia hi. Hiai bang thilpiak zia ka in kipaklua ka hihman un ka kipahtu uh KTZ ah ka hon taklang uhi. Toupan makaih in vualzawl zel hen chih ka deih sak uhi.

Mr. Thangmuanmung Hangzo S/o H. Pumzalian in Multi-Tasking Staff (MTS), D.M. University a asepn a khaloh alak masakpen EBCC Mata a hon piakna tung ah kipaklua ka hihman un ka kipahtu uh KTZ ah ka hon taklang uhi. Toupan makaih in vualzawl zel hen chih ka deih sak uhi.

**Upa T Rumzachin**, *TBUC Secretary, EBCC Mata*

## **PENSION SUM BIAKINN BAWLNA DIN THAWH:**

Unaupa Zamthianlal s/o Dongzapau, Assam Regiment, Teikhang in a sepna apan tukum in pension a. Aman pension sum amuh apan Biakinn kibawl lel huhna hikawm in leh hiai tan a amah pitu Pathian kianga kipahtu genna in EBCC Teikhang EBCC building fund in ₹ 4,00,000/- (Cheng nuaili geih) dt 20.10.2025 in hon pia a, kipahtu petmah hi. Hiai thilpiak thupi leh kipahtu sa in Saptuamte'n na hon theihpih uh deih in hiaiah ka hon taklang hi. Toupa'n vualzawl zel hen.

- **Upa Ginkhup Guite**, *Secretary TBUC, EBCC Teikhang*

## **KIPAHTHU GENNA:**

Mr. Nangmuansiam s/o Khamkhanlian in nek-le-tak zonna a Chennai a va om in EBCC BYF Mualpheng in hun sawtpi a ka poimoh gige uh Microphone nih (2) hon piakna tung ah kipaklua ka hihman un ka kipahtu uh KTZ ah ka hon taklang uhi. Toupan a sepna leh mai lam ah makiah in vualzawl zel hen chih ka deih sak uhi.

- **Lalminlian Ngaihte**, *Chairman TBYF, EBCC Mualpheng* ■



# Ordain Sunna

1. **Min: UPA S KAMKHOSIAM**
2. Pianni: 1954
3. Pianthak Hun: June 1974
4. Baptisma tanni: 25, November, 1974  
Baptistu: Pastor Pauzalang
5. Pa Min: (L) Upa Chinzagou
6. Nu Min: (L) Hauzaniang
7. Zi min: Mrs. Demvung
8. Kitenni: March 13, 1986
9. Gil a gah goutan neihzah: 3, Pasal: 2, Numei: 1
10. Tulel a omna Saptuam: EBCC Bethany
11. Tulel a kizatna: TBUC Member
12. Ordain Kum: December 04, 2011  
Ordain Petu: Rev L Kham Kho Lun
13. Pahtakna lai san kum: Active
14. Toupa kiang a tawldam ni: Oct. 26, 2024 Vui ni: Oct. 27, 2024
15. Vuitu Pastor & Saptuam: Pastor B Kamkhansawm, EBCC Bethany
16. Natna: Cancer
17. A tanchin gelbeh nop: Nek zonna lam ah bang tan hiam Indian Army (EME) in ana pang hi. EBCC Bethany kiphuhtung a kipan Missions Committee ah omden in Chairman leh Vice Chairman chihte ana len gige hi. DMC Lamka North Division member inleng ana pang ngei hi. Amah mi kipe zoutak leh ahihna tantan a Saptuam leh Pathian adia kizang nuam gige leh taima mahmah ahi. Hatlou sasa in leng Devotion hoh gige hi. October 26, 2024 (Kiginni) Nitaklam dak 3:10 PM vel in Innmun ah a muan Toupa kiang hon paisanta hi. *Toupa Khasiangthou in a nutsiat a inkuan leh Saptuamte khamuan in makaih zel hen.*




1. **Min: UPA N ZAMZATHANG**
2. Pianni: September 06, 1964
3. Pianna Khua: Lawibual
4. Pa Min: (L) N Thangkanneng
5. Nu Min: (L) Zennu
6. Zi min: Mrs. Thari



7. Kitenni: October 05, 1994                      Kitengsak tu: Pastor S Ginzam
8. Gil a gah goutan neihzah: 5                      Pasal: 1                      Numei: 4
9. Tulel a omna Saptuam: EBCC Vaal Veng
10. Tulel a kizatna: TBUC Member
11. Ordain Kum: 2015                      Ordain Petu: Rev Dr. S Vung Minthang
12. Pahtakna lai san kum: Active
13. Toupa kiang a tawldam ni: October 15, 2024  
Vui ni: October 18, 2024
14. Vuitu Pastor & Saptuam: Pastor H Chinkhanlian, EBCC Vaal Veng
15. Natna: Heart Case
16. A tanchin gelbeh nop: 1986 kum in Lamka a apu L Lianzakap  
kiang pansan in laizil in om hi. EBCC Khominthang a omlai a Upa  
ordination la ahi a, Vaal Veng a inn mun ua July 21, 2023 in pem  
in huai a a inkuan un khosa uhi. Kum 2022 in GBC ah MTC Course  
ana zou hi. A Natna toh kisai in Lamka Damdawi inn leh inmum a  
kietkol theih dandan in kienkol ahihnung in hoih thei taktaklou  
a om ziak in Guwahati lam a ki-enkou ding in zintou uhi. Hong  
hoih tou ding a lam-et ahihlai in October 15, 2024 nitaklam dak  
5:00 pm in a it a ngaih teng nusia in a nna asep Toupa kiang hon  
tawldamsan ta hi.  
*Toupa Khasiangthou in a nutsiat a inkuan leh Saptuamte khamuan  
in makaih zel hen.*

1. **Min: UPA DALKHANKAM HANGHAL**
2. Pianni: 1943
3. Pianna Khua: Mimbung, Mizoram
4. Pa Min: (L) H. Paugin
5. Nu Min: (L) Henchiin
6. Zi min: (L) Nialzaching
7. Kitenni: 1969                      Kitengsak tu: Pastor Lamgin
8. Gil a gah goutan neihzah: 4  
Pasal: 2                      Numei: 2
9. Tu melmuh zah: 22                      Tusawn: 6
10. Tulel a omna Saptuam: EBCC Tangnuam
11. Tulel a kizatna: TBUC Member
12. Ordain Kum: December 12, 1999
13. Pahtakna lai san kum: 2013
14. Toupa kiang a tawldam ni: Nov. 04, 2024 Vui ni: Nov. 05, 2024
15. Vuitu Pastor & Saptuam: Pastor B Thangngaihmung, EBCC Tangnuam
16. Natna: Sunghoihlou




17. A tanchin gelbeh nop: Vangtah huaitak in a neulai un apan sihsan a anu toh haksapi in khosa uh ahihman in Aibulon a a behte/tanaute un pem ding in va genpiah ua, huchiin Kum 1950 in Mimbang apan in Aibulon ah pemlut uhi. Azi neihma in Indian Army ah na lut in full pension zoulou in innlam awlmoh ziak leh a nu' thumanna ziak in hongtawp hi. Amah mi taima, gamvak lunglut mi ahihdung zui in sabeng khawng in kuansek hi. Huchi ahihdungzui in 1971 kum in alawmpa (L) N. Khamkhangin f/o N. Thangchinhau toh agamvakna uah Vompi toh kisualkha in, siding dinmun a a omlai in alawmpa'n va hunkhia in, tuni ahun nanung tan dong hon dampih hi. Zin leh vak, khosak nuamtuam zaw ding lametna in Aibulon apan in Phaitong ah pem uhi. Huai a hun bangtan hiam khosa a a om nung un a zi ittak (L) Nialzaching in 2003 kum in ana sihsan hi. Amah tuh midamthei tak leh taima tak ahi a, ahitheihnatan leh a damliai nak leh sep ding zong in tutna phan chihte tha-it tak in sem zel hi. Huchibang a a omlai in sunghoihlou in bahtak in hong om a, doctor ki-ensak in, hihtheih dandan in kikem tou a, amah leng hoihtou zel dan a koih ahihlai in lametlouhpi in (4/11/24) nitak 11:00 PM in a muan Toupa kiang ah honna khawlsanta hi.
- Toupa Khasiangthou in a nutsiat a inkuan leh Saptuamte khamuan in makaih zel hen.*

1. **Min: UPA TUNZALAANG**
2. Pianni: December 27, 1939
3. Pianna Khua: Khuangkhai Kholui
4. Baptisna: July 13, 1957  
Baptise tu: Pastor Thongluan
5. Pa Min: (L) Thongin
6. Nu Min: (L) Nuamkhoching
7. Zi min: (L) Chingkhongai
8. Kitenni: 1957, Kiteng saktu: Pastor Thongluan
9. Gil a gah goutan neihzah: 9                      Pasal: 4                      Numei: 5
10. Tu melmuh zah: 19                                  Pasal: 9                      Numei: 10
- Tusawn melmuh zah: 13                              Pasal: 5                      Numei: 8
11. Tulel a omna Saptuam: EBCC Khuangkhai
12. Tulel a kizatna: TBUC Member
13. Ordain Kum: 1992                                  Ordain Petu: Rev Khaikhanthang
14. Pahtakna lai san kum: Pension
15. Toupa kiang a tawldam ni: October 29, 2024  
Vui ni: October 30, 2024
16. Vuitu Pastor & Saptuam: Pastor T Songkhanlun, EBCC Khuangkhai



17. Natna: Awmna
18. A tanchin gelbeh nop: Amah Pathian ngaihsak mi ahihmah bang in a hatlai nite in Pathian nasepna a hihtheih bangbang in kizang in biakin chowkidar in pang gige hi. Amah mi nunem, pu-le-pi, tu-le-ta, beh-le-phung ngaihna mahmah mi ahi.  
*Toupa Khasiangthou in a nutsiat a inkuan leh Saptuamte khamuan in makaih zel hen.*

1. **Min: UPA TH GINKHOTUAN**
2. Pianni: November 15, 1957
3. Pianna Khua: Bungkot, Henglep Sub Division
4. Pianthak Hun: 1982
5. Baptisma tanni: 1975
6. Pa Min: (L) Jamsuan
7. Nu Min: (L) Chingkhojam
8. Zi min: (L) Niangzaman 1976 a kiteng in 2011 a sihsan



July 06, 2012 Nu Nianghoih toh kiteng nawn

Kiteng saktu: Pastor Hs. Chinsuanthang

9. Gil a gag goutan neihzah: 6 Pasal: 4 Numei: 2

10. Tu melmuh zah: 16

11. Tulel a omna Saptuam: EBCC Vaal Veng

12. Tulel a kizatna: TBUC Member

13. Ordain Kum: December 10, 2000 Ordain Petu: Rev L

Kham Kho Lun

14. Pahtakna lai san kum: Active

15. Toupa kiang a tawldam ni: September 26, 2024 Vui ni:

September 27, 2024

16. Vuitu Pastor & Saptuam: Pastor H Chinkhanlian, EBCC Vaal Veng

17. Natna: Diabetes

18. A tanchin gelbeh nop: Ginom leh muanhuaitak in EBCC Tonglon (T) a Saptuam a na kemtou den a, damlouhna ziaik in Vaal Veng ah 2024 hong pemlut in EBCC Vaal Veng Saptuam ah hong kipia uhi. Saptuam kepna ah ginom leh muanhuai tak a a sep lai in diabetes hong uang in a kal hon sukha ahihman in thuakzoulou in September 09, 2024 in Lamka Damdawi in ah amuan Toupa kiang ah tawldam ding in honna paisan ta hi.

*Toupa Khasiangthou in a nutsiat a inkuan leh Saptuamte khamuan in makaih zel hen.* ■



DECEMBER 2024

## Kipahthu Genna leh THUMNA DINGTE

**1 NIPINI:** December khabul damtaka honpikai i biak Pathian kiang kipahthu gen in, tukha Ama deihna banga manpha leh gahsuahtak a i zat chiat theihna ding in thum ni.

**2 SEPPATNI:** Saptuam Office tuamtuum a panpihtute ziak a kipahthu gen in, amauten Pathian leh heutute deihna banga honsep zom zel theihna ding un leh chidamna amau leh inkuante a ding in thumsak ni.

**3 SEPNAWNNI:** Tulai in i gamsung ah zu leh khamtheih tuamtuum hong uang mahmah a poi isa hi. Hiai in saptuam siangthouna leh mimal hinkhua naktak a susia ahihman in, hiaibang a khamtheih zuak leh ching ten hon tawpsan theihna ding un Pathian buan in thum ni.

**4 NILAINI:** Tuni in tukum khawmpilian a ordain ding Upa mi 50 leh Pastor mi 4 leh a zite uh toh orientation nei ding, a tel ding leh sinsaktu heutute thumpih ni.

**5 NINGANI:** Tuni a kipan date 8 sungteng Khawmpilian 76na Centenary Hall ah om ding, Khawmpi intek EBCC Elim Veng, Khawmpi Ulian, thugentu, Bible Study latu ding, palai mun gamla leh nai a kipan a hong paite leh vaisaite thumpih ni. Khawmpi Manpha leh gahsuahtak a zoh ahihna ding in thum ni.

**6 SINTAWPNI:** Khawmpi vaihawmna nikhat ni, Pathian deihna banga A Saptuam maban ding geel ahihna ding in, vaihawm Uliante leh Palaite a ding in Pathian Kha pawlna ngen in thum ni.

**7 KIGINNI:** Khawmpi vaihawmna nihna tan a honpi i biak Pathian kianga kipahthu gen in, thupukna te saptuam hoihna ding leh khantouhna ding a hong hihchiat theihna ding in thum ni. Zingchiang Ordination leh mipi biakkhawmna hunte manphatak a zat ahihna ding leh Pathian phatna lapawl sading tuailaite thumpih ni.

**8 NIPINI:** Central Dorka Pawl, 8 Division chih Dorka Pawl leh Tualsung a Dorka Pawl in 2024-2025 March tan a Year Plan kiguangte a tamzaw Pathian ompihna toh semkhinta kipahthu gen in sep ding omlaite manphatak a sepkhiaak ahihtheihna ding in thum ni.

**9 SEPPATNI:** EBC Kumsim Khawmpi 76na lohching leh gahsuahtak a honzousak i biak Pathian kiang kipahthu gen ni. Khawmpi 77na Ulian dinga Toupa'n honpiak thakte leh GS, Director leh DS thakte ziak a kipahthu gen in, amauten Toupa deihna banga saptuam hon makaihzal theihna ding un salam khalam damna ngen in thumpih ni.



**10 SEPNAWNNI:** Semtute tate omna Beth Haran Hostel a naupang omte leh wardente a di'n thumsak ni. Saptuam in naupang kepna hostel Sinzawl, Suangdoh leh Thanlon ah i neihte leh huai a om naupangte leh enkai tute Pathian ompihna ngen in thumpih ni.

**11 NILAINI:** DotProj nuai apuankhui zilna 3rd batch nuai sintu mi 13 te leh huai a sinsaktute Pathian vualzawlna chidamna leh a sinna uh lamzangtak a hon zoh theihna ding in thumpih ni.

**12 NINGANI:** 12-15 sung BYF EBCC Vengnuam in Phalbi khawmpi nei ding Rev V Thangkhanmuan Youth Coordinator in thugen ding, 12-15 second coming chialpina EBCC Pearson ah Rev. Gin Malsawm in hun zang ding lohching leh manphatak a zat ahitheihna ding in thumpih ni.

**13 SINTAWPNI:** Tuni a kipan in date 15 sungteng EBCC Lailam veng in chialpina nei ding uh, Evan T Damkhothang thugentu in pang ding chialpina gahsuh ahitheihna ding in thumpih ni. Zingchiang a kipan in i saptuam schoolte winter break kipan ta ding ua, kumthak January 10, 2025 in lut nawn ding uhi. Naupangte leh semtute chidamna leh break manpha tak a azat theihna ding un thumpih ni.

**14 KIGINNI:** Tuni leh zingchiang in EBCC Newlane in Khristianna leh Khotang chih thupi a nei in chialpina nei ding Rev Kamchinkhup Thugentu in pang ding Toupa deihna banga chialpina lohching ahitheihna ding in thum ni.

**15 NIPINI:** Missionary ding a WEC leh SIM tungtawn a kuankhia leh tua ding a kisa lellelte hong lamzan theihna ding un thumpih ni.

**16 SEPPATNI:** December 17 leh 18, 2024 in EBCC Songtal Dorka Pawl Diamond Jubilee lopna program ah Rev Dr S Vung Minthang thugenpi in pang ding a, Rev Dr V Ginsianthang DS Singngat Division in Souvenir honna nei ding a Dorcas Coordinator Nemngaihawmawi in thugenna hunkhat nei ding thumna ah phawk ni.

**17 SEPNAWNNI:** Tuni a kipan 19 sungteng BYF EBCC Bethany in Phalbi Khawmpi zang ding ua Rev Ginminthang Child Coordinator in thugenna hun zang ding, program lohching leh manpha tak a zoh ahitheihna ding in thumpih ni.

**18 NILAINI:** Tuni leh zingchiang in EBCC Thanlon in BYF leh BCD Jubilee zang ding ua Rev Kamchinkhup Director of Missions in hunpi zang ding vaisai dingte leh program Pathian kithuahpihna toh manphatak a zoh ahitheihna ding in thumna ah phawk ni.

**19 NINGANI:** Lametnamun (LRRC) ah khamtheih saltang mi 50 te leh semtute banah amaute enkoltu/kemtute Pathian apan suahtakna leh chidamna ngen in thumpih ni.

**20 SINTAWPNI:** December 20-22, 2024 sung EBCC Lungchin in "BCD ANNUAL DAY cum GOSPEL WINTER MEET" neih sawm ua, hiai hun ah sunglam & pawlam vai-ah kitaitehna tuamtuum zangding ua, Area pastor,

Local Chairman leh Local Secretary-ten thugenna hun zangding uhi. 20-22 Hotdamna chialpina EBCC Tangnuam in nei ding Rev. Gin Malsawm thugen ding Programme lohchingtak a zat ahithheihna din thumpih ni.

**21 KIGINNI:** Tuni a kipan in i saptuam Head quarter leh DS office te kikhak ta ding ua Pathian in kumthak honpi kai leh January 8, 2025 in lutnawn ding, semtute leh inkuante chidamna ding in thumpih ni.

**22 NIPINI:** Gamsung buainate ziak a Khristmas hunte program i geel leh bawl bangbang sukbuai ahilhouna ding in Pathian venbitna ngen in thum ni.

**23 SEPPATNI:** Saptuam a thumtute leh thilpiak petute ziak a kipahtu gen in, Toupa'n thum ding leh thilpiak peding tamsem honpiakna ding in thumlai ni.

**24 SEPNAWNNI:** Khristmas Program tunitak a kipan zat hita ding. Hiai hunpi sunga saptuam chih a thugen dingten Toupa' Saptuamte poimoh leh taksap sukha a, Tanchinhoih ankuang a luikhiak chiat theihna ding un Pathian kha thopna ngen in thumpih ni.

**25 NILAINI:** Tuni mikhialte hondam ding a i Toupa Jesu Khrist hong pianni, koimun peuh a kizang ding, hiai ni tungtawn a mihingte lak ah lemthu hong leng a Pathian kha vehna i tanchiatna ding in thum ni.

**26 NINGANI:** EBC Central Choir, Lamka North Division Choir leh Saptuam chih a BYF lapawl hoih tak tak Toupan honpiakte ziak a kipahtu

gen in, amauteh Pathian leh Saptuamte deihna banga Pathian phatna lasak hon sutzom zel theihna ding un thumna ah phawk ni.

**27 SINTAWPNI:** NDPN nuai a lam tuamtuam a sem leh kisin a om lelte hong lohchin ua lamzan theihna ding in thumpih ni. Mission fieldte a lungzuangtak a om, i gingtu kibatpihte leh semtu missionaryte a ding in Pathian Khasiangthou pawlna leh Immanuel Pathian ompihna ngen in thumpih ni.

**28 KIGINNI:** I saptuam a semtu khenkhat kikhek kual kha leh mohpuakna thak len kha ding bang Pathian in hon piaklai ziak in kipahtu gen in amauteh thanuam tak a hon septheihna ding un Pathian akipan pilna ngen in thumsak ni.

**29 NIPINI:** Kumthak a sepnamun kisuankha ding semtute a hun taka a sepna munthak ding ua kipia a tuntheihna ding uleh kithalop leh kipezoutak a a nna chiat uh a septheihna ding un thumna ah phawk ni.

**30 SEPPATNI:** Tuni a kipan January 1, 2025 sungteng EBCC Mission Compound in Hotdamna Chialpina programme zang ding Rev. Gin Malsawm thugen in pang ding thumpih ni.

**31 SEPNAWNNI:** Tukum beini tan a honpi Toupa tung ah kipahtu gen in, i sepkhelh bawlkhelhte ziak a thupha tawi in a deihna bang a kumthak a kalsuan ding in kilan thak ni.



Thupi

# I Lampite Enchian Ni

→ KAHLATE 3:40 ←

**THUGEN**

Rev. Dr. S. VUNG MINTHANG  
GENERAL SECRETARY

**BIBLE STUDY**

Rev. GIN MALSAWM, PRINCIPAL, GBC

**DECEMBER 06 & 07, 2024**

**PALAI VAIHAWMNA**

**10:30 AM - 05:00 PM**

- KHAWMPI HONNA:  
Upa M. Thanglianmang  
*Chairman, Khawmpi 76na*
- KIPUMPIAKNA:  
Lapite khut ah
- VAIDAWNNA THUGEN:  
Upa V. Ginchinpau, *Vice Chairman, CEC*
- PALAI PAISATE SUUNNA:  
Rev. Dr. S. Vung Minthang  
*General Secretary*
  - ↳ Business Chairman  
Upa M. Thanglianmang
  - ↳ Business Vice Chairman  
Upa Dr. T. Vumchinpau
  - ↳ Business Rec. Secretary  
Upa K. Vungzamawi
  - ↳ Business Asst. Rec. Secy  
Upa P. Langbiaklian

**07/12/2024**

- ANKUANG LATNA LEH TAWPNA:  
Chairman deihna bang in

**DECEMBER 07 & 08, 2024**

**BIBLE STUDY**

**06:30 AM - 08:00 AM**

- KIPUMPIAKNA:  
Lapite khut ah
- BIBLE STUDY:  
Rev. Gin Malsawm  
*Principal GBC*

**DECEMBER 08, 2024**

**MIPI BIAKNA**

**10:30 AM - 01:00 PM**

- PANTU : Rev. Paukhanmang Guite
- PHATKHAWMNA : Lapite khut ah
- THILPIAK LANTU : Rev. V. Thangkhingin
- PHATNA LAPAWL : EBC Central Choir
- THUGENNA : Rev. Dr. S. Vung Minthang  
*General Secretary*
- PAHTAKMAN HAWMNA :  
Director of Ministries makaih in
  - ↳ **UPA PAHTAKNA LAI**  
*Pekhetu- Upa M. Ginzalian, Chairman CEC*
  - ↳ **SEMTU PAHTAKNA LAI**  
*Pekhetu- Upa M. Thanglianmang  
Chairman, Khawmpi 76na*
- PHATNA LAPAWL : GBC Choir
- HUNKHAKNA : Rev. Dr. V. Ginsianthang  
*Divisional Supdt. Singngat Divn*

**DECEMBER 08, 2024**

**ORDINATION LEH BIAKNA KIKHOP**

**02:00 PM - 05:00 PM**

- PANTU : Rev. Dr. B. Luaichinthang
- PHATKHAWMNA : Lapite khut ah
- THILPIAKLATNA : Rev. L. Kham Kho Lun
- PHATNA LAPAWL : Lamka North Divn Choir
- THUGENNA : Rev. Dr. S. Vung Minthang  
*General Secretary*
- THUCHIAMNA : Director of Ministries
- ORDAINNA : Officiating Minister
  - ↳ Panpihtute : DS leh DEC Chairman teng
  - ↳ Certificate : Upa M. Thanglianmang  
*Chairman, Khawmpi 76na*
- PHATNA LAPAWL : EBC Central Choir
- COMMISSIONING : General Secretary
- KHAWMPI REPORT : Recording Secretary
- PHATNALA NANUNG : Lapite khut ah
- KHAWMPI KHAKNA : Upa Dr. T. Vumchinpau  
*Vice Chairman, Khawmpi 76na*

**DECEMBER 05, 2024 (NINGANI) 10:30 AM - 03:00 PM PALAI MINKHUMNA  
GOSPEL CENTENARY HALL AH A OM DING.**

BOOK POST

Postal Regd. No. MNP 07 | Regd. No. 22344/70

If undelivered, please return to

The Editor,  
KCHRISTIAN THUKIZAKNA  
P.O. Box-6, Dorcas Hall,  
New Lamka-795006, Manipur, India



## KHRISTMAS 2024

*Lemna Kumpi hong piang in,  
mimal, inkuan leh khotang ah kilemna  
leh Kipumkhatna hon tun hen.*

-Editorial Board



Edited & Published by Rev. Dr. S. Vung Minthang for the Evangelical Baptist Convention  
Designed and Printed at Convention Book House, Dorcas Hall Campus, New Lamka - 795006